

Barcode - 4990010218130

Title - Hindu Sangit

Subject - LANGUAGE. LINGUISTICS. LITERATURE

Author - Choudhury, Pramatha

Language - bengali

Pages - 48

Publication Year - 1945

Creator - Fast DLI Downloader

<https://github.com/cancerian0684/dli-downloader>

Barcode EAN.UCC-13



হিন্দু সংগীত

প্রথম সংস্করণ
শ্রী-ইন্দিরা দেবী জে. কুব্বানী



বিশ্বভারতী গ্রন্থালয়
২, বঙ্কিম চাট্জো স্ট্রীট
কলিকাতা

প্রকাশক শ্রীপুলিনবিহারী সেন
বিশ্বভারতী, ৬৩ ছারকানাথ ঠাকুর সেন, কলিকাতা

প্রকাশ বৈশাখ ১৩৫২

মূল্য আট আনা

মুদ্রাকর শ্রীসুধনারাঘণ ভট্টাচার্য
তাপসী প্রেস, ৩০ কর্নওয়ালিস স্ট্রীট, কলিকাতা

সংগীতপরিচয়

ভারতবর্ষ গানের দেশ। আমাদের ছেলেরা গান গুনতে গুনতে ঘুমিয়ে পড়ে, বুড়োরা সুর করে করে পুরাণ পড়েন, মেয়েরা গান গাইতে গাইতে জাঁতা পেঁষে ও ছাত পিটোয়। মাঝিরা নৌকা বাইতে বাইতে গান করে; প্রতি পালপার্বণে গানের ছড়াছড়ি। রাজস্থানের ইতিহাস গানেতেই রক্ষিত ও প্রচারিত হত। প্রত্যেক ছন্দের বোধকরি আলাদা সুর আছে। এ দেশের মন্দিরে গান, মাঠে গান, গৃহে গান, বনে গান, উঠতে বসতে খেতে গান,—এমন কি ঘাট পর্যন্ত গান! এখানে গানের কাছ থেকে পালানোই শক্ত।

বাংলাদেশের নিজস্ব গান—বাউল কীর্তন প্রভৃতি সম্বন্ধে আমি কিছু বলতে চাই নে। তার রস বোধহয় সুরের চেয়ে কথার উপর বেশি নির্ভর করে। বাঙালী মনের যে অংশ পল্লীবাসী, তা যে এই সরস কথা ও সরল সুরের সংযোগে মেতে ওঠে এবং ভাবে ভোর হয়, তা আমরা সকলেই অল্পবিস্তর জানি ও বুঝি। কিন্তু আমাদের সব আশা আকাঙ্ক্ষা সে সুরে ব্যক্ত হয় না, আমাদের বর্তমান জীবনযাত্রার সব কথায় সে সুর সাড়া দিতে পারে না। এখন যে আমরা হাটের মাঝে, পৃথিবীর চোখের সামনে এসে দাঁড়িয়েছি,—মায়ের আঁচল ছেড়ে সংসারে প্রবেশ করেছি। ইতিমধ্যে বাইরের অনেক শহরে রাজকীয় জিনিস আমাদের অন্তরঙ্গ হয়ে উঠেছে। বাঙালী মেয়ের আটপৌরে কাপড় দেশী কালাপেড়ে লালপেড়ে শাড়ি হলেও, যেমন বেনারসী শাড়ি দূর থেকে উড়ে এসে জুড়ে বসে তার পোশাকি বেশের স্থান অধিকার করেছে; তেমনি কীর্তনাদি খাটি বাংলা গান হলেও, বাগরাগিনীসংবলিত

ওস্তাদী বা দরবারী সংগীত বহুকাল থেকে আমাদের দেশে এমন প্রচলিত হয়ে পড়েছে যে, আজ তার কুলশীলের খোঁজ না করেই তার সঙ্গে আত্মীয়তার বন্ধন স্বীকার করে নিতে হবে।

এই সংগীতের একটি সুবিধে এই যে, ভারতবর্ষের উত্তরভাগে তা প্রায় সমভাবেই প্রচলিত। সুতরাং আর্ষাবর্তের সব জাতের সঙ্গে বোঝাপড়া করবার পক্ষে সংস্কৃতবেঁধা হিন্দী ভাষার জ্ঞান যেমন প্রধান সহায়, তেমনি তার সকল প্রদেশের সংগীত-রস আদানপ্রদানের পক্ষে ওস্তাদী সংগীতের সঙ্গে কিঞ্চিৎ পরিচয় থাকা অতীব আবশ্যিক। এ পরিচয় যে আরো ঘনিষ্ঠ এবং লোকসামান্য নয়, তার একটা কারণ আমার মনে হয় এই যে, আমাদের সংগীতবিজ্ঞা আয়ত্ত করা অতিশয় কষ্টসাধ্য। যা জানবার জন্য এত পরিশ্রম করতে হয়, সে শৌধিন বিজ্ঞা আয়ত্ত করতে আজকাল অনেকেই নারাজ,— এবং যা জানি নে তা ভাল লাগা অসম্ভব। আমাদের অন্ত্যন্ত শাস্ত্রের মত সংগীতশাস্ত্রও অসংখ্য বিধিনিষেধে জটিল, এবং যারা সে শাস্ত্রের উত্তরাধিকারী, তাঁরা দশজনের শিকার সৌকর্যার্থে তার সরল সংস্করণ প্রকাশ করবার কোনো চেষ্টা করেন নি, বরং যিনি যতটা জানেন স্ববংশের মধ্যে আবদ্ধ রাখতেই চেয়েছেন। দুঃখের বিষয় এ দেশের পেশাদার ওস্তাদের, সংগীত ছাড়া অপরাপর বিষয় শিক্ষাদীক্ষা এতই কম যে, কিসে সংগীতের উন্নতি হয় বা জনসাধারণের মধ্যে তার প্রচার হয়, সে সম্বন্ধে তাঁদের ভাববার আবশ্যিক বোধ হয় কিনা সন্দেহ। অপরপক্ষে এও বলতে হয় যে, পুরাকালের রাজারাজড়া বড়লোক তাঁদের যে-ভাবে প্রতিপালন ও সমাদর করতেন, একালে সে সম্মান ও সাহায্যলাভে তাঁরা বঞ্চিত হওয়ায়, দারিদ্র্যবশতঃ অল্পচিন্তাতেই তাঁদের সমস্ত মন দিতে হয়। তারপরে সেকালে স্বরলিপি করবার পদ্ধতি না থাকায়, ওস্তাদের স্মরণশক্তির উপর এতটা নির্ভর করতে হয় যে, তাঁরা সংগীতের শাস্ত্রবিধি সম্বন্ধে হিন্দু-বিধবার মত শুদ্ধাচারী ও শুচিবায়ুগ্রস্ত হয়ে পড়েছেন। পাছে মুখস্থ বিজ্ঞার কোনো ব্যতিক্রম ঘটে, পাছে অমুক আইনের অমুক ধারা

অনুসারে দণ্ডনীয় হন, এই ভয়ে তাঁরা নিজেও অস্থির, এবং দেশস্থ লোককেও অস্থির করে তুলেছেন।

ওস্তাদী গানের প্রতি সাধারণ অভক্তির আর এক কারণ, ওস্তাদদের কায়দাকাহ্ন। তাঁদের অনাবশ্যক মুখভঙ্গী, হাতকর অংগভঙ্গী এক কথায় যুদ্ধানোষ, এবং পরম্পরের কূটতর্কে,—যা প্রশস্ত মূন্দর রাজপথ হওয়া উচিত, তাকে এমনি কষ্টকিত জটিলারণ্যে পরিণত করেছেন যে, পথ-চলতি লোকের পাশ কাটিয়ে যাওয়া কিছু বিচিত্র নয়। বিজ্ঞানাত্মক এই একটা মজুরি ও শিক্ষানবিশি আছে, তা অর্থকরীই হোক আর শৌখিনই হোক। কিন্তু শিক্ষার চরম ফলের মধ্যে তার প্রথম স্তর ও কঠিন অংশের সমস্ত চিহ্ন লোপ পাওয়া উচিত,—যেমন চাষের ফলে নগ্ন রুক্ষ ভূমি স্বর্ধশস্ত্রের মন্থণ রঙিন আন্তরণতলে অঙ্কিত হয়। যুরোপীয়গণ এ কথা খুব বোঝেন এবং প্রথম থেকেই ছাত্রদের সংযত শোভন ভাব রক্ষা করবার শিক্ষা দিয়ে থাকেন। আমাদের সংগীতাচার্যগণ কেন যে এদিকে লক্ষ্য রাখেন না বলতে পারি নে। কানে হাত না দিয়েও চড়া স্বর নেওয়া যে অসম্ভব নয়, কিংবা উচ্চারণ ও মুখের ভাব যত বিকৃত হবে, সংগীত তত সংস্কৃত হতে যে বাধ্য নয়, তা তো হাতে হাতেই প্রমাণ করা যায়; বিশেষতঃ মেয়েদের তো সংগীতচর্চার সময় এ সব বিষয় খুব সাবধান থাকা দরকার। সংস্কৃত কাব্যে দেখা যায় সেকালে রাজবাড়ির মেয়েদেরও গীতবাহু শেখাবার প্রথা ছিল, স্মৃতরাং বোধহয় তখন সংগীতসরস্বতীর সঙ্গে লক্ষ্মীশ্রীর এতটা বিচ্ছেদ ঘটে নি। একালে আশা করি আমাদের মেয়েরা আবার সেই শুভসম্মিলন সাধন করবেন।

ওস্তাদী গানের প্রতি আধুনিক ঔদাসীচের আর-একটি কারণ নিশ্চয়ই তার ভাষা। উচ্চাঙ্গের হিন্দুসংগীত প্রায়ই মূলহিন্দীর কোনো না কোনো অপভ্রংশে রচিত, এবং সে ভাষা অধিকাংশ বাঙালীর অপরিচিত বলে, সে গানও তেমন মর্মস্পর্শী বোধ হয় না। তার উপর অশিক্ষিত লোকের মুখে মুখে গানের অনেক কথা এমন বিকৃত হয়ে যায় যে, শিক্ষিত লোকের

পক্ষেও অর্থ করা অসম্ভব হয়ে ওঠে। বাণী শুধু রাখবার দিকে গুস্তাদরা আর একটু দৃষ্টি রাখলে ভাল হয়। অবশ্য সুর ও কথা মিলেমিশে গান হয়, এবং বাক্য ও অর্থের জায় এস্থলে এ ছটিকে আলাদা করা অসম্ভব। কিন্তু পূর্বেই বলেছি হিন্দীভাষা আর্ধাবর্তের মনের চাবিধরুপ। সেই সঙ্গে যখন সে-দেশের গানেরও এই একই চাবি, তখন কি সংগীতভক্ত বাঙালীর হিন্দী শেখার প্রতি একটু মনোযোগ দেওয়া উচিত নয়? তা ছাড়া সুর ও কথার মধ্যে সংগীতক্ষেত্রে সুরেরই প্রাধান্য মানতে হবে; কারণ কথা বাদ দিয়েও সংগীত হয়,—যথা যন্ত্রসংগীত কিংবা রাগালাপ, পাখীর ডাক কিংবা শিল্পর কাকলি। কিন্তু সুর বাদ দিলে কথা সংগীতের এলাকা ছাড়িয়ে কবিতার রাজ্যে গিয়ে পড়ে। অবশ্য মিষ্টি কথারও একটা সাংগীতিক ধ্বনি আছে, যার মানে না বুঝলেও ভাল লাগতে পারে,—যেমন কোনো কোনো অজানা ভাষার আওয়াজও শ্রুতিমধুর বোধ হয়। সংস্কৃত শ্লোক বা মন্ত্রের মাহাত্ম্য তার সুগভীর ধ্বনির উপর কতটা নির্ভর করে, তা সর্বলোকবিদিত। সে হিসেবেও বলতে পারি হিন্দী-ভাষার মূল্য কম নয়। জানি নে অভ্যাসবশতঃ কি-না, কিন্তু হিন্দী গান সম্পূর্ণ না বুঝলেও তা আমাদের কানে ষত মিষ্টি লাগে, বাংলায় ভাঙলে সেই গানেরই আর তত লজ্জৎ থাকে না। একটা দৃষ্টান্ত দিলেই বুঝতে পারবে।—

“অব ভজ ভোর প্রাত হরিনাম,

বন্দে সকল দুখ মিট যাত যাত

আওর সকল শরীর হোত কল্যাণ।”

জানি নে তোমাদের কি মনে হয়, কিন্তু “অব ভজ ভোর প্রাত হরিনাম” শুনে আমার মনচক্ষে ফুটে ওঠে গঙ্গার ধারের—বিশেষতঃ কানীর গঙ্গাতীরের ছবি; যেন নদীর তীরে বসে কোনো সৌম্যমূর্তি সাধু একতারা বাজিয়ে গান করছেন, এবং ভোরের বিবুঝিরে হাওয়া এসে তাঁর ও আমাদের শরীরমন পবিত্র করে দিচ্ছে। আমাদের একজন কবি যে শরৎ-প্রভাতকে ‘নিরাময়

নির্মল' বিশেষণে ভূষিত করেছেন, সেই প্রভাত যেন এখানে যুঁতিমান হয়ে উঠেছে, তাই "সকল শরীর হোত কল্যাণ"। এ কথাগুলি কোনো বাঙালীর বুঝতেও কষ্ট হয় না।

এবার এরই বাংলাটা শোন—

"সবে কর আজি তাঁর গুণগান
যাবে সকল দুঃখ, সব পাপ তাপ,
ওরে সকল সন্তাপ হইবে নির্বাণ।"

বাংলা গানটি ভাঙা বেশ ভালই হয়েছে, কিন্তু তবু যেন কি একটা রস উবে যায়, সেই বিশেষ তারটি থাকে না। ওস্তাদী হিন্দী গানের এই রসটি আশ্বাস করবার জন্যে এক শিকার দরকার। সে শিকারটুকুর বর্ণপরিচয় হতে হতেই লোকের ভাল লাগতে আরম্ভ করে, এই আমার দৃঢ় বিশ্বাস; কারণ আমরাও তার বড় বেশিদূর এগোই নি। আজ তার প্রথম ভাগের কতকগুলি মূলসূত্র তোমাদের ধরিয়ে দেবার ইচ্ছে আছে। যাদের কাছে তা পূর্বপরিচিত, তাঁরা পুনরাবৃত্তি মার্জনা করবেন।

আমাদের সকল শাস্ত্রেই মূল যেমন বেদে অনুসন্ধান করলে পাওয়া যায়, সংগীতশাস্ত্রেও তাই। ঋগ্বেদের মন্ত্র যে উদাত্ত অনুদাত্ত স্বরিত নামে তিনটি স্বরে উচ্চারিত হত এবং আজও হয়ে থাকে, যারা পণ্ডিতের মুখে তা না শুনেছেন, তাঁরা আদি ব্রাহ্মসমাজের শ্লোকপাঠে তার কতক পরিচয় পেতে পারেন। সামবেদও এখনও গীত হয়, কিন্তু ঠিক পূর্ব সুরে কিনা জানি নে। এবং দুঃখের বিষয় সে গান কখনও শুনি নি, তাই তোমাদেরও তার নমুনা শোনাতে পারিগুম না। এই বৈদিক ত্রিস্বর থেকেই ক্রমশঃ আমাদের বর্তমান সপ্তস্বর সম্ভবতঃ উদ্ভাবিত হয়েছে। যুরোপীয়দের আধুনিক বিচিত্র সংগীতও তাদের পূর্বতন ধর্মযাজকদের মন্ত্রপাঠের স্বরগ্রামের উপর প্রতিষ্ঠিত।

পৌরাণিক যুগে লবকুশের রামায়ণগান লোকপ্রসিদ্ধ; ও ততদিনে

বোধহয় সাতটি শুদ্ধ স্বরের অভিব্যক্তি হয়েছিল। বড়ই আপসোসের বিষয় যে, আমাদের ঐতিহাসিক স্মৃতি তত প্রবল না হওয়াতে এবং স্বরলিপির প্রচলন পূর্বে না থাকাতে, এই সব আদিম গানের কোনো প্রতিধ্বনি কলিযুগ পর্যন্ত এসে পৌঁছয় নি। বৌদ্ধযুগান্তে ব্রাহ্মণ্য যুগের পুনরুত্থানের সময় যে সংগীতের যথেষ্ট প্রচলন ও সমাদর ছিল, তার প্রমাণ সংস্কৃত কাব্যাদিতে পাওয়া যায় মাত্র। সংগীতশাস্ত্রকে গর্ভবেদ ও পঞ্চমবেদ বলে উল্লেখ করা হত, এবং ব্রাহ্মণ নাট্যাচার্যদ্বারা তা রাজ-অস্তঃপুরেও শেখানো হত—এর থেকে সে সম্মানের মাত্রা বোঝা যায়। তা ছাড়া দেবলোকে যে বিষ্ণুর জন্ম, সরস্বতীদেবী যার অধিষ্ঠাত্রী, নারদ যার দ্বারা হরিগুণ কীর্তন করেন, অঙ্গরাগণ যার সাহায্যে দেবতাদের মনোরঞ্জন করেন এবং শ্রীকৃষ্ণ যার টানে তাঁর ভক্তদের মধ্যে অধিষ্ঠান করেন বলে পুরাণের কথন, সে বিজ্ঞাকে যদি আমরা হেয়জ্ঞান করে থাকি তা সে নিতান্তই আমাদের অধঃপতনের ফলে। তবু আমরা অত্যন্ত স্থিতিশীল ও অতীতভক্ত জাত বলে, যুখে যুখে এতকাল পরেও যে অস্ততঃ মুসলমান আমলের সংগীতপদ্ধতি কথকিং রক্ষিত হয়েছে, সে আমাদের ওস্তাদবংশপরম্পরার রূপায়, এবং সেজন্য তাঁরা আমাদের কৃতজ্ঞতা ও ধন্যবাদের পাত্র।

মুসলমানগণ তাঁদের সঙ্গে কোনো জাতীয় সংগীতপদ্ধতি এনেছিলেন কিনা জানি নে। তাঁরা সে সময় কিছু রূঢ়প্রকৃতির ছিলেন, এবং গানবাজনা নাট্যোন্নাসের পক্ষপাতী ছিলেন না বলেই শোনা যায়। তবে দক্ষিণে, যেখানে মুসলমানপ্রভাব কম, সেখানে সংগীতের রূপ সম্পূর্ণ না হোক, অনেকটা ভিন্ন বলে, মনে হয় যে হয়তো সেইটেই আমাদের আদিসংগীতের বংশধর এবং আধাবর্তের প্রচলিত সংগীত মুসলমান ও হিন্দুসংগীতের সংমিশ্রণের ফল। একেবারে অনাধি সংগীতের আভাস পাহাড়ী-গানে পাওয়া যেতে পারে। বলা বাহুল্য স্বরলিপি এবং ইতিহাসজ্ঞানের অভাবে এ সমস্তই আনুমানিক সিদ্ধান্তমাত্র। দক্ষিণী বা কর্ণাটী সংগীতের চঙ আমার তো মন্দ লাগে না,

তবে ওস্তাদী গৌড়ামির কাছে খাঁচি উত্তর-হিন্দুস্থানী সংগীত ছাড়া আর সবই শব্দপর্যায়ের অন্তর্গত।

অনেক দক্ষিণী গান শুনে শুনে বোকা যায় যে, উত্তরের সঙ্গে মোটামুটি কতকগুলি প্রভেদ এই যে, ওদের সুর-তাল আমাদের চেয়ে হালকা ও একটু ক্ষুদ্র; এবং প্রত্যেকবার পুনরাবৃত্তির সময় ওরা একটু-একটু করে ছোট ছোট তান দিয়ে সুরের বিস্তার করে, তাকে বলে পল্লবী, অল্পপল্লবী ইত্যাদি। ওদের রাগের নাম এবং রূপও আমাদের সঙ্গে সম্পূর্ণ মেলে না। পূর্ব-ভারতে যেমন বাংলা, পশ্চিম-ভারতে তেমনি মহারাষ্ট্রী সংগীতও প্রচলিত। কিন্তু হিন্দুস্থানই হিন্দুসভ্যতার বাস্তবতা, সেইজন্য হিন্দুস্থানী সংগীতই সম্প্রতি আলোচ্য বিষয়।

প্রাচীন সংগীতের অনেক পুঁথিগত শাস্ত্র আছে, যথা শার্ঙ্গদেবকৃত সংগীত-রত্নাকর, সোমেশ্বরকৃত রাগবিবোধ, অহোবলকৃত সংগীতপারিজাত ইত্যাদি। অপেক্ষাকৃত আধুনিক সময়ে ৮শতাব্দীমোহন গোস্বামী, ৮শৌরীন্দ্রমোহন ঠাকুর, ৮কৃষ্ণধন বন্দ্যোপাধ্যায় প্রভৃতি সংগীতাত্মরাগী বাঙালীগণ এইসব সংস্কৃত গ্রন্থের অনুবাদ ও সারসংগ্রহ করে প্রাচীন সংগীতশাস্ত্রকে সাধারণের আয়ত্তের মধ্যে এনে দিয়ে আমাদের উপকার করেছেন। এর মধ্যে কৃষ্ণধনবাবুর গীত-সুত্রসার গ্রন্থের সঙ্গে আমার যেটুকু পরিচয় আছে, তাতে বিশ্বাস হয়েছে যে তাঁর মত সমদর্শী, প্রাজ্ঞ, ও প্রাজ্ঞল লেখক যে-কোনো দেশেই দুর্লভ। তিনি কোনো-একটি বিষয়ের আশপাশ সবদিক দেখে ও দেখিয়ে, বিবেচনা ও যুক্তিপূর্বক যে সিদ্ধান্তে উপনীত হন, তাতে আনাড়ির মনও স্বভাবতঃ সার দেয়; কারণ যে-বিষয় কিছু জানি তার সম্বন্ধে কোনো লোক যদি যুক্তিসংগত কথা বলছে দেখতে পাই, তাহলে যে-বিষয় জানি নে সে-সম্বন্ধেও তার বুদ্ধি-বিবেচনার প্রতি আস্থা হয়। সুতরাং যিনি সংক্ষেপে হিন্দুসংগীতসম্বন্ধে বিশদ জ্ঞান লাভ করতে চান, তাঁকে কৃষ্ণধনবাবুর গীতসুত্রসার দুই খণ্ডের আলোচনা করতে বলি। প্রথম খণ্ডে সংগীত-শাস্ত্র এবং দ্বিতীয় খণ্ডে সংগীত-

কর্তব্য সম্বন্ধে যা লিপিবদ্ধ আছে, তা জানাই শৌধিন সংগীত-চর্চার পক্ষে যথেষ্ট। তিনি বলেন, প্রাচীন পুঁথি থেকে আধুনিক হিন্দু-সংগীতশিকার উপদেশ কমই পাওয়া যায়। অতএব তা নিয়ে বেশি নাড়াচাড়া অনাবশ্যক। সে কথা সত্য, কারণ লক্ষ্মী যেমন বাণিজ্যে বাস করেন, সংগীত-সরস্বতী তেমনি সুগায়কের শ্রীকণ্ঠে বাস করেন,—পুঁথির পক্ষে নয়। তবে ধর্মপুরাণের অনেক কথা যেমন আমরা একালে সম্পূর্ণ বিশ্বাস না করলেও শুনতে ভালবাসি, তেমনি সংগীত-পুরাণের কতকগুলি কথা বর্তমান সংগীতশিকার কাজে না লাগলেও শুনতে ভাল লাগে। যথা—বাগরাগিনীর দেবমূর্তির কল্পনা। তাঁদের তন্ত্রুরা যথারীতি শ্রবণ করলে তাঁরা গায়কের রাগালাপে নিজমূর্তি ধারণ করেন। এই ধ্যানমূর্তি এতই পরিষ্কৃত যে, সংস্কৃত শ্লোকে তার পরিষ্কার বর্ণনা আছে ও সেই অনুসারে ছবি পর্যন্ত আঁকা হয়েছে।

এই বিশ্বাসই বোধহয় আর একটি পৌরাণিক বিশ্বাসের মূল,—অর্থাৎ তাঁরা যখন দেবতা, আমরা যখন-তখন ডাকলে চলবে না, তাঁদের অবকাশমত ডাকা চাই; তাই বিশেষ সময়ে বিশেষ রাগ গাইবার ব্যবস্থা করা হয়েছে। যথা—সকালে ভৈরব, দুপুরে সারঙ্গ, বিকেলে মুলতান, রাত্রে বেহাগ ইত্যাদি।

কৃষ্ণধনবাবু অতি অশাস্ত্রীয় প্রকৃতির লোক, সুতরাং তিনি অবশ্য এর আধুনিক ব্যাখ্যা এই দেন যে, সেকালে রাজবাড়িতে প্রহরে প্রহরে বৈতালিকদের গান হত, তাই একঘেয়ে বা এলোমেলোভাবে না গেয়ে তারা বিশেষ সময়ের জন্যে বিশেষ রাগ নির্দিষ্ট করে দিয়েছিল। যে-সময় যেটি শোনা অভ্যাস, সেই সময় সেটি শুনলে যে ভাল লাগে, সে বিষয় তো আমরাও আজকাল সাক্ষ্য দিতে পারি। শাঁখ বাজানোর সঙ্গে আমাদের মনে যে মঙ্গলতাব জড়িত, রসুনচৌকির আওয়াজ শোনবামাত্র বিবাহ-উৎসবের যে আনন্দ আমাদের মনে জেগে ওঠে, তা কি অপর কোনো দেশের লোকের হওয়া সম্ভব?—বিশেষতঃ শব্দের স্মৃতিউদ্দীপনী-শক্তি প্রসিদ্ধ। তাই শুনতে

শুনতে আমাদেরই সকাল-সন্ধ্যার রাগ সময়ে শুনলে বৃত্ত ভাল লাগে, অসময়ে ভৃত্ত ভাল লাগে না ;—ওস্তাদের ত কথাই নেই। সংগীতসম্বন্ধে আর একটি কৌতুকাবহ কিংবদন্তি এই যে, বিশেষ-বিশেষ রাগের বিশেষ ক্ষমতা আছে, যথা—দীপক গাইলে আগুন জলে ওঠে, মেঘমল্লার গাইলে বৃষ্টি নামে ইত্যাদি। প্রমাণস্বরূপ অনেক গল্পও প্রচলিত আছে। সপ্তস্বর সাতটি জীবের কর্তৃস্বর থেকে গৃহীত বলে সকালে আর এক ধারণা ছিল, যথা—ময়ূর থেকে সা, বৃষ থেকে রে, ছাগল থেকে গা, বক থেকে মা, কোকিল থেকে পা (একনো সেইজন্তু কবিরী বলেন কোকিল পঞ্চমে গায়) অথ থেকে ধা এবং হাতী থেকে নি।

সেকালের লোকেরা কিছু অধিক কল্পনাপ্রবণ ছিলেন বলে তাঁদের লেখার নীর বাদ দিয়ে কীর গ্রহণ করা একটু শক্ত। তাই বলে মনে কোরো না যে প্রাচীন সংগীতশাস্ত্রের সবই অতিরঞ্জিত এবং অনাবশ্যক জল্পনা। সকল বিষয়ের চূড়ান্ত যীমাংসা করবার দিকে হিন্দু-মনের যে স্বাভাবিক ঝোঁক ছিল, সংগীতশাস্ত্রেও নিশ্চয় তার পরিচয় পাওয়া যাবে। তবে কালে অনেক পরিবর্তন এবং সেই সঙ্গে উন্নতিও হয় বলেই বলছিলাম যে, তাঁদের সব সিদ্ধান্ত আমাদের কালের উপযোগী নয়। কিন্তু এমনও অনেক জিনিস আছে, বিশেষতঃ রাগ-তালের বিবরণ, যাতে একালের নজির পাওয়া যায়, এবং যা না জানলে আধুনিক হিন্দুসংগীতসম্বন্ধেও পরিষ্কার ধারণা হয় না। যেমন কিছু ব্যাকরণ না জানলে ভাষাজ্ঞান সম্পূর্ণ হয় না।

রাগ কাকে বলে জান ?—জানলেও বোঝানো শক্ত; যেমন 'প্রাণ' কথাটার মানে আমরা সকলেই বুঝি, কিন্তু বোঝাতে হলে কাঁপরে পড়ে যাই। আমি বড় জোর বলতে পারি যে, আমাদের দেশের গানের সুর রাগরাগিনী নামক কতকগুলি শ্রেণীতে বিভক্ত। তার কাজ হচ্ছে প্রতি সুরের আতি-পরিচয় দেওয়া। যেমন মানুষমাত্রেই পাঁচ ইন্দ্রিয় আছে, অথচ গঠন রঙ আচার ব্যবহার বেশ ও নিবাস অনুসারে তারা বিশেষ বিশেষ জাতিতে

বিতর্ক ;—তেমনি গানের স্বরযাত্রাই সপ্তস্বরের লীলা, কিন্তু সেই স্বরগুলি সাজাবার তফাতে রাগের তফাৎ হয়। এই উপমার একটু বিশেষ উপযোগিতা এই যে, কৃষ্ণধনবাবুর মতে এক এক জাতি বা সম্প্রদায়ের মধ্যে প্রচলিত বিশেষ বিশেষ সুর থেকেই বিভিন্ন রাগিণীর উৎপত্তি হয়েছে। কথটা যুক্তি-সংগত বলে বোধ হয়, কারণ অনেক রাগিণীর দেশের নামে নাম, যথা—সিন্ধু, গুর্জরী, মুলতান, সুরট ইত্যাদি। একই রাগে অনেক গান হতে পারে, তাই শ্রেণী নাম দিয়েছি ; কিন্তু সেই রাগের বিশেষ লক্ষণ সবগুলিতে থাকা চাই। সে লক্ষণগুলি কি, তা চিনতে অনেক অভ্যাস এবং শিক্ষার দরকার। প্রসিদ্ধ ফরাসী নাট্যকার মোলিয়েরের অঙ্কিত একটি হঠাৎ-নবাব ৪০ বৎসর বয়সে লেখাপড়া শিখতে গিয়ে আবিষ্কার করে আশ্চর্য হয়েছিলেন যে, এতদিন ধরে তিনি যে-ভাষায় কথা কয়ে আসছেন, তাকেই বলে গল্প! আমরাও হয়তো যে-সব চলিত বাংলা গান গেয়ে আসছি, অজ্ঞাতসারে তার রাগতাল বজায় রেখেই গেয়ে থাকি। যেটা অজ্ঞানে অনেক সময়ে করি, সেইটেই জ্ঞাতসারে করবার পদ্ধতির নাম শিক্ষা। কেউ কেউ বলতে পারেন যে, রাগতাল বুঝলেই কি গান বেশি মিষ্টি লাগবে?—যেহেতু শেক্সপীয়র বলে গেছেন যে, অপর কোন নাম দিলেও গোলাপের গন্ধ সমানই মধুর হত! কিন্তু রাগরাগিণীর সঙ্গে একটু আধটু পরিচয় না থাকলে আমার মনে হয় আমাদের দেশের গান সম্পূর্ণরূপে ভাল লাগবার ব্যাঘাত ঘটে; যেমন জাতিভেদসম্বন্ধে কোন ধারণা না থাকা আমাদের দেশের লোককে ভাল রকমে চেনবার পক্ষে বিশেষ অন্তরায়;—রাগবিচার ও জাতবিচার দুই প্রথাই আমাদের এমন মজ্জাগত। তা ছাড়া শুধু গাইবার তত্ত্ব ততটা না হোক, গান রচনা করবার অঙ্কে বা গুণীর গুণপনার মাত্রা বোঝবার অঙ্কে রাগবোধ কিছু থাকা নিতান্ত দরকার।

অবশ্য এই অল্প সময়ের মধ্যে আমি তোমাদের রাগরাগিণীসম্বন্ধে বিস্তারিত বিবরণ দেবার অসাধ্য-সাধন করতে চাই নে। তবে এইটুকু মোটামুটি বলে

রাধি—যা অনেকেই আগে শুনে থাকবেন—যে, প্রাচীন সংগীতশাস্ত্রমতে ছয় রাগ, ও ছত্রিশ রাগিনী তাঁদের স্ত্রীস্বরূপা; তা ছাড়া পুত্রপৌত্রেরও অভাব নেই। আধুনিক মতে ছয় স্বতন্ত্র সঙ্গে ছয় রাগের যোগ থাকা খুব সম্ভব। কিন্তু রাগিনীর সঙ্গে তাঁদের অবরনস্তি বহুবিবাহে আবদ্ধ না করে স্বাভাবিক সাদৃশ্য অনুসারে রাগরাগিনী শ্রেণীবদ্ধ করলেই বোঝবার পক্ষে সহজ হয়। মুসলমান আমলে এই প্রকার সাদৃশ্যমূলক শ্রেণী-বিভাগই করা হয়েছিল, যথা—অষ্টাদশ কানাড়া, ত্রয়োদশ তোড়ি, ষাটশ মল্লার, নব নট, সপ্ত সারঙ্গ। কিন্তু এর অনেক রাগিনীই স্বরলিপি-অভাবে লোপ পেয়েছে। নানা মুনির নানা মতের ভিতর সংগীতশাস্ত্রে ভারত ও হিন্দুস্তানের মতই প্রধান। ভারত বাঙ্গালীর সমসাময়িক, এবং আদি নাট্যকার বলেও প্রসিদ্ধ। হিন্দুস্তান আমাদের আবাল্য-স্বপ্ন পবননন্দন কি না তা বলা যায় না, তবে ঐ নামে একজন পণ্ডিত ব্যক্তি ছিলেন, এটুকু নিশ্চিত। এঁদের কারও মূলগ্রন্থ পাওয়া যায় নি; পূর্বে যে গ্রন্থকারদের নাম করেছি, তাঁরা এঁদেরই অসম্পূর্ণ প্রচলিত মত সংগ্রহ করেছেন মাত্র। সেই জন্য মতের অনৈক্যও দৃষ্ট হয়। কিন্তু ওস্তাদী সংগীতচর্চার পক্ষে, যে-বিষয় সকলে একমত, তার কিছু কিছু জানাই যথেষ্ট।

আমাদের গানের সাধারণ কতকগুলি লক্ষণের মধ্যে একটা এই যে, বার বার প্রথম থেকে পুনরাবৃত্তি হয় ও ঠিক শেষে শেষ হয় না, কিন্তু সম নামক তালের একটা বিশেষ কোঁকে শেষ করতে হয়। আর-একটা এই যে, রচয়িতার নাম শেষভাগে দেওয়া থাকে, তাতে লিপিবদ্ধ করবার অন্তত একটা উদ্দেশ্য সিদ্ধ হয়। আরো একটা এই যে, মুখে মুখে শেখা ও শেখানো হয়, তাই স্বরণ-শক্তি থাকা খুব আবশ্যিক। আর রাগরাগিনীর কথা তো পূর্বেই বলেছি।

রাগের যেমন প্রকারভেদ আছে, আমাদের গানেরও তেমনি প্রকারভেদ আছে—তবে অত নয়। উচ্চাঙ্গের হিন্দুস্থানী সংগীত মোটামুটি তিন প্রকার, —রূপদ, খেয়াল ও টপ্পা। কথা ও তাল বাদ দিয়ে শুধু কতকগুলি নিরর্থক

শব্দ উচ্চারণপূর্বক রাগের রূপ দেখানোর একটা পদ্ধতিও আছে, তাকে বলে আলাপ করা। সন্ধ্যাবেলা গানের বৈঠক বসলে ওস্তাদরা প্রায়ই ইমনকল্যাণের আলাপ করে সেই রাগিণীর গান ধরেন—কেন জানি নে। ইমন পারশ্বদেশ থেকে এসেছে শুনে পাই, তাই হয়তো মুসলমান বাদশারা তাকে এই সম্মানের আসন প্রদান করেছিলেন।

মুসলমানরা আসবার আগে থেকেই উত্তরপশ্চিমে ধ্রুপদের প্রচলন ছিল। ধ্রুপদে চারটি কলি বা ভাগ থাকে—আস্থায়ী, অস্তরা, সফারী ও আভোগ। পাখোয়াজে যে-সব ভারি ভারি তাল বাজানো হয়, যথা চোতাল, ধামার, সুরফাঁকতাল ইত্যাদি, তাতেই ধ্রুপদ গাওয়া হয়। ধ্রুপদের কথাও ভাবও গম্ভীর। যাদের কেবল ধ্রুপদ গাওয়া অভ্যাস ও ব্যবসা, হিন্দুস্থানে তাদের বলে "কালার্বৎ" অর্থাৎ কলাবস্ত। স্বনামধন্য তানসেন ধ্রুপদের গায়ক ও রচয়িতা ছিলেন, এবং আকবরের সময়ে জন্মগ্রহণ করেছিলেন। তিনি নাকি আগে হিন্দু ছিলেন, পরে মুসলমান হন। তাঁর আগে নায়ক গোপাল ও বৈজু বাওরা, এবং পরে হুঁদি খাঁ ও সুরদাস ভাল ধ্রুপদ-রচয়িতা বলে প্রসিদ্ধ।

খেয়ালের উৎপত্তি সম্বন্ধে মতভেদ আছে। কেউ বলেন, বাদশা মহম্মদ শা ধ্রুপদ শুনে শুনে বিরক্ত হয়ে সুগায়ক সদারজকে নতুন কোনোরকম গান তৈরি করতে আদেশ করেন,—ফলে জন্মাল খেয়াল। কেউ বলেন, তার পূর্বে সুলতান হোসেন নামে জোয়ানপুরের এক নবাব খেয়াল সৃষ্টি করেন। কৃষ্ণধনবাবুর মতে কোনো বিশেষ ব্যক্তি কোনো বিশেষ সময় খেয়ালের সৃষ্টি করেন নি; কোনো সম্প্রদায়ের মধ্যে ঐরকম গান পূর্বাধি প্রচলিত ছিল, সুলতান হোসেন হয়তো তাকে জাতে তুলে নিয়েছেন। কারণ কথাটার মানে থেকেই বোঝা যায় যে, তখনকার সভ্য ওস্তাদসমাজ খেয়াল জিনিসটাকে একটু অবজ্ঞার চোখে দেখত। যাই হোক, খেয়াল ধ্রুপদের চেয়ে সংক্ষিপ্ত; এবং প্রায় দুই কলিতেই সম্পূর্ণ—আস্থায়ী ও অস্তরা। তার বেশি থাকলেও

স্বর অন্তরায়ই যত হয়। রাগরাগিণীসম্বন্ধে খেয়াল-রূপদে বিশেষ তফাত নেই, তালে আছে। কাওয়ালি, একতারা, যৎ প্রভৃতি খেয়ালের তাল।

রাগসম্বন্ধে যেমন, তালসম্বন্ধেও তেমনি অতি মোটা ছু-একটি কথা ছাড়া এখানে কিছু বলবার সময় বা স্থান নেই। তবে এইটুকু বলা যেতে পারে যে, একই ছন্দের অনেক তাল চিমা করে গাইলে রূপদের তাল হয় এবং মাত্রা অর্ধেক করে নিলে খেয়ালের তাল হয়, নামও বদলায়। কিন্তু আসল প্রভেদ এই যে, খেয়ালে ঘেরকম ছোট ছোট তান গিটকিরি ব্যবহার হয়, রূপদে তা হয় না; এবং রূপদে ঘে-রকম গমক ব্যবহার হয়, খেয়ালে তা হয় না। খেয়ালের তাল যেমন অপেক্ষাকৃত লঘু, ভাবও তাই। ঘেরকম অকিঞ্চিৎকর বিষয়ে অনেক খেয়াল রচিত হয়, তা শুধু হিন্দী কথার মিষ্টতার গুণে পার পায়। যথা—কারো পান খেয়ে ঠোঁট লাল হয়েছে, কারো শাড়ি রঙিয়ে বা চুড়ি মাড়িয়ে দিতে হবে, কারো নূপুর বাজছে, কারো ননদী বকছে। হিন্দী খেয়ালরচয়িতার মধ্যে সদারঙ্গ ও আধারঙ্গ বিখ্যাত।

টপ্পা খেয়ালের চেয়ে আরো সংক্ষেপ, আরো হালকা এবং আরো তানযুক্ত। কথায় কথায় তান। এ সম্বন্ধেও এই একটা গল্প প্রচলিত আছে যে, সদারঙ্গের এক সাক্ষর গোলাম রহুল লক্ষ্মীয়ে গিয়ে খেয়ালের উৎকর্ষ সাধন করেন। তাঁরই ছেলে গোলাম নবী, শোরী নামক এক পাঞ্জাবী স্ত্রীলোকের প্রতি আসক্ত হয়ে পড়েন এবং তাঁকে উদ্দেশ্য করে যে-সব গান রচনা করেন, তাঁরই নাম টপ্পা। শোরীর টপ্পা পাঞ্জাবী ভাষায় রচিত, সেটা ঠিক; এবং শোরীর নামও শেষে উল্লিখিত আছে, তাতে অনেকের মনে হয় যে শোরীমিঞাই বুঝি রচয়িতা। টপ্পারও খেয়ালের মত কেবল এক আখায়ী ও অন্তরা, এবং খেয়ালের প্রায় সকল তালই তাতে ব্যবহৃত হয়; শোরীর টপ্পা অধিকাংশ মধ্যমান তালে। কেবল রাগিণীতেই খেয়ালের সঙ্গে টপ্পার প্রভেদ। টপ্পা আধুনিক এবং সংক্ষিপ্ত বলে—কাফী, পিলু, বারোয়া, কিংকিঁট, লুম প্রভৃতি আধুনিক রাগে রচিত হয়ে থাকে। প্রাচীন রাগের মধ্যে ভৈরবী, বাঘাজ,

কালান্ধা, দেশ ও সিন্ধুই ব্যবহৃত হয়। টপ্পার হাঙ্কা তান গিটকিরির সঙ্গে ভারি রাগ, তাল বা জাব খাপ খায় না।

এই তিনরকম গানের মধ্যে যে ওস্তাদ যে চণ্ডের সাধনা করেছেন, সেই প্রকার গানই গেয়ে থাকেন, কারণ অভ্যাসবশতঃ সেই এক ধরণই তাঁর গলায় সহজে আসে। পরম্পরের রাগতাল ব্যবহার না করার দরুন এই তিনটি রীতি একেবারে পৃথক হয়ে পড়েছে।

ঠুংরী নামে আর এক প্রকার গানও হিন্দুস্থানে প্রচলিত আছে, তা টপ্পার রাগিনীতে গাওয়া হলেও, তাল ও সুরের বৈচিত্র্যবশতঃ স্বাতন্ত্র্যলাভ করেছে। একই গানে সুকৌশলে একাধিক রাগিনী এবং রীতি মিশিয়ে এই বৈচিত্র্য সম্পাদন করা হয়। ওস্তাদী গোড়ামির কাছে সেটা অবৈধ বা শ্রুতিকটু বোধ হলেও, সাধারণ শ্রোতার কাণে মিষ্টি লাগে। আমার বোধ হয় আমাদের আজকালকার অনেক মিশ্র সুর ঠুংরীশ্রেণীভুক্ত।

গান শুধুকে এত কথা বললুম বলে মনে কোরো না যে গানই সংগীতের সর্বস্ব। সংস্কৃতে সংগীত বলতে নৃত্যগীতবাণ্ড তিনই বোঝাত; এখন তার অর্থ সংকীর্ণ হয়ে কেবল গানে এসে দাঁড়িয়েছে। কিন্তু কণ্ঠকে যদিও শ্রেষ্ঠ যন্ত্র বলা হয়েছে, তবু মানুষের হাতে গড়া বহুতর যন্ত্র আছে যা কথাকে অতিক্রম করে আমাদের মনে অনির্বচনীয়ের আভাস এনে দেয়। আর ভগবান ভাল গলা না দিলে ভাল গাইয়ে হওয়া সম্ভব নয়; কিন্তু চলনসই সুরবোধ থাকলেই যন্ত্র ও চেষ্টাপূর্বক ভাল বাজিয়ে হওয়া যেতে পারে।

বৈদিক যুগেও যন্ত্রের অভাব ছিল না, কারণ ম্যাকডনেল সাহেব বলেন, বাঁশি বাজানো, বীণা-বাজানো, ঢোল-বাজানো প্রভৃতি পেশার উল্লেখ বেদে আছে। প্রাচীন সংগীতশাস্ত্রে চারপ্রকার বাস্তবযন্ত্রের নাম—তত বা তারের যন্ত্র, যেমন সেতার; বিত্তত বা চামড়ার যন্ত্র, যেমন ধোল; ঘন বা কাঁসার যন্ত্র, যেমন মন্দিরা; এবং শুষ্কির বা বায়বীয় যন্ত্র যেমন বাঁশি। আমাদের সর্বপ্রধান যন্ত্র অবশ্য বীণ বা বীণা, যার নাম শুনতে দেশবিদেশে কারো বাঁকি

নেই, যদিও আওয়াজ বোধহয় অনেকেই শোনেন নি। অত্যন্ত প্রাচীন পদ্ধতির জায় বীণবাজানোর রেওয়াজও এখন যাত্রাজে বেশি। ডান হাতের সব আঙুল দিয়ে বাজাতে হয় বলে শুনেছি বীণা বাজানো বড় শক্ত। তানপুরা বা তবুরাও বহু প্রাচীন যন্ত্র এবং আজ পর্যন্ত ওস্তাদী গানের প্রধান সহায়। পুরাণে বলে, ব্রহ্মার এক শিষ্য ছিলেন তুস্কর; নামের সাদৃশ্যে মনে হয় তাঁর সঙ্গে এ যন্ত্রের কিছু যোগ আছে। আমাদের বাস্তবজ্ঞের মধ্যে সেতার ও এস্রাজই বেশি চলিত ও বাজানো সহজ। গানের সংগতের জন্ম এখনকার কালে তবুরার চেয়ে এস্রাজই বেশি উপযোগী বলে আমার বোধ হয়—বিশেষতঃ মেয়েদের পক্ষে। আমাদের মেয়েদের মধ্যে ধারা গান করেন, তাঁদের সকলকেই আমি এস্রাজ শিখতে অনুরোধ করি। কারণ এস্রাজ হাক্কা, মিষ্টি ও একটানা, স্মৃতরাং সংগতের যন্ত্রের সব গুণই ওতে বর্তমান। তানপুরা যন্ত্রটা কিছু বেশি ভারি, ছেলেবেলা থেকে অভ্যাস না থাকলে তার সঙ্গে গাওয়াও শক্ত। সেতারের বড় ভাইয়ের নাম সুরবাহার। সে যন্ত্রটি দেখতে বেশ সুন্দর, আওয়াজও সেতার অপেক্ষা প্রবল। কিন্তু তাতে শুধু আলাপই বাজানো হয়, তাই খুব ভাল বাজিয়ে ছাড়া কেউ বড় বাজায় না। গং বাজাবার পক্ষে হরেন্দরে সেতারই সবচেয়ে ভাল। শুনতে পাই আলাউদ্দীনের সমসাময়িক আমীর খশ নামক একজন সংগীতগুরু সেতারযন্ত্রের স্রষ্টা, এবং তার সঙ্গে বাজাবার জন্মেই তিনি পাখোয়াজ ভেঙে বাঁয়া-তবলা নির্মাণ করেন। আমাদের ছেলেরা বাঁয়া-তবলা শেখবার দিকে একটু মনোযোগ দিলে ভাল হয়। তাতে তালজ্ঞানও যেমন হয়, সঙ্গে গানবাজনাও তেমনি জমিয়ে তোলে। যুরোপীয় যন্ত্রের সঙ্গে আমাদের যন্ত্রের তফাৎ এই যে, ওদের প্রধান যন্ত্র পিয়ানোর আওয়াজ এত জোরালো যে, অনেক বড় জায়গায় অনেক লোকে একত্র বসে শুনতে পারে। আর আমাদের প্রধান যন্ত্র সেতারের আওয়াজ এত মৃদু যে, একটি ছোট ঘরে কেবল জন-কুড়ি লোক বসে শুনলে তবেই তার রস পাওয়া যায়। তাও যদি অঙ্কার ও

নিরালা হয় তবে আরো ভাল ;—টানের বা তারার আলোর চেয়ে বেশি তাঁর আলোতে যেন সে ধ্বনি খোলে না, বিজলিবাতি এবং অমনোবোগী লোকের ভিড় ও কটে চাপা হাসিকথার গুঞ্জে তো একেবারেই মরমে মরে যায়—এত সুকুমার তার প্রাণ, এত ক্ষীণ তার কারা।

বেদের সময় থেকে মুসলমান আমল পর্যন্ত যখন হিন্দুসংগীতের নিশ্চয় অনেক পরিবর্তন ঘটেছিল, তখন মুসলমান আমল থেকে বর্তমান কাল পর্যন্ত অনেক পরিবর্তন হওয়া অবশ্যস্বাভাবী। এক-একটি বিশেষ ধণ্ড-শির অধিকৃত ভাবে অমর হয়ে থাকতে পারে বটে, যথা কালিদাসের শকুন্তলা কিংবা তানসেনের কোনো গান (যদি সেখা থাকত)। কিন্তু শিরকলার আদর্শ যুগে যুগে বদলাতে বাধ্য, কারণ সেটি সমাজের তৎকালীন মনোভাবের প্রকাশ—এবং সমাজ সচল পদার্থ, স্থাণু নয়। তাই ইংরেজরাজের আগমনের পর থেকেও হিন্দুসংগীতের অনেক বদল হয়েছে ও হচ্ছে। তাকে কেউ বলবে উন্নতি, কেউ বলবে অবনতি, কিন্তু তার পরিণতি কেউ রোধ করতে পারবে না।

ব্রাহ্মসমাজের গান একটি ভাণ্ডারবিশেষ, যেখানে কালাবর্তী ধ্রুপদ থেকে হাঙ্কা টপ্পার সুর, কীর্তনবাউল থেকে আধুনিকতম মিশ্রসুর পর্যন্ত সবরকম রীতির নমুনা সঞ্চিত আছে। সুতরাং যিনি ঐতিহাসিকভাবে আমাদের গানের ক্রমবিকাশ অন্বেষণ করতে চান, তাঁর পক্ষে ব্রাহ্মসংগীত আলোচনা প্রথম।

ইংরেজ-আমলের একটি নূতন রীতি হচ্ছে, তম্বুরার বদলে হারমোনিয়মের সঙ্গে গান গাওয়া। মধ্যো তার যত চল হয়েছিল, আজকাল তাতে কিছু তাঁটা পড়ে গেছে; কারণ ইংরেজ-প্রভাবের প্রথম ধাক্কায় যত প্রাচ্যবর্জন এবং পাশ্চাত্যগ্রহণের দিকে বৌক পড়েছিল, কিছুদিন থেকে তার বিপরীত স্রোত বইতে আরম্ভ করেছে। কিন্তু অভ্যস্ত জিনিস ছাড়ব বললেই ছাড়া যায় না, বিশেষতঃ যদি তার কিছু সুবিধে থাকে। হারমোনিয়মসম্বন্ধে সম্প্রতি

যে বিরুদ্ধভাবে জেগেছে, ইংরেজী বোধহয় তার প্রবর্তক এবং আমরা কেউ কেউ তার অহুমোদকমাত্র। আমিও এই বিজ্ঞানীদের একজন তবে একই কারণে কি না জানি নে। ভাল হারমোনিয়মের ভাল বাজনা আমাদের আধুনিক গানের অঙ্গপযোগী সংগত বলে আমি মনে করি নে। কিন্তু অধিকাংশস্থলে যেরূপ নিকৃষ্ট যন্ত্রে কর্কশ আওয়াজ বের করা হয়, তাতে আমাদের গান ঢেকে ফেলে ও নষ্ট করে দেয়। পিয়ানোতেও নিতান্ত হালকা নাচুনে দেশী গান ভিন্ন ভাষায় চলে না; সুতরাং বেয়ালা কিংবা এস্রাজের টানা মোলায়েম আওয়াজই আমাদের সংগতের পক্ষে সাধারণতঃ উপযুক্ত।

যন্ত্র ছেড়ে দিয়ে গানের প্রতি দৃষ্টি করলেও বিদেশী প্রভাব লক্ষিত হবে। থিয়েটারের সাধারণ গান ও কন্সার্টে তার খেলো পরিচয় পাওয়া যায়, কারণ তাতে কেবল ইংরেজী চতুর্ধ শ্রেণীর ব্যাণ্ডের নকল করবার চেষ্টা করা হয়ে থাকে। দ্বিজেন্দ্রলাল রায় তাঁর হাসির গানে যে ইংরেজী কায়দা মিশিয়েছেন, তা বিষয়ের উপযোগী ও ভাবের সহায় বলেই আমার বিশ্বাস। স্বদেশী গানে যে ধুয়া, বা গানের প্রত্যেক কলির শেষভাগ হালকা সুরে একসঙ্গে গাওয়ার ইংরেজী রীতি প্রচলিত হয়েছে, তার সূত্রপাত আগে হলেও দ্বিজেন্দ্রলালই তার বহুলপ্রচার করেছেন। তাঁর স্বদেশী গান অনেকে একত্রে গাইতে পারবে বলে বোধহয় তিনি ইচ্ছা করেই তাতে সাদা ইংরেজী-টঙের সুর বসিয়েছেন। কিন্তু গুনতে পাই যে তা সত্ত্বেও আমাদের দেশী রাগিণী ঠিক বজায় আছে। এবং তিনি যে দেশী রাগতাল বিলক্ষণ বুঝতেন ও নিজে বিস্তৃতভাবে গাইতে পারতেন, তা তাঁর ও তাঁর গানের ভক্তমাত্রেই জানেন। রবীন্দ্রনাথও আমাদের গানে নানা নূতনত্বের প্রবর্তন করেছেন। তাঁর গানে ইংরেজী সুরের ছায়াও পাওয়া যায়, মিশ্র সুরেরও তিনি কিছু পক্ষপাতী। তার ভক্ত্যে লোকে নিন্দাই করুক আর প্রশংসাই করুক, তাঁর অনেক গান আমাদের সংস্কৃতির অঙ্গ হয়ে গিয়েছে ও এত প্রচলিত হয়ে পড়েছে যে পরিচয়পত্র অনাবশ্যক। বিশেষতঃ আজকাল স্বরলিপি হওয়াতে গানকে বেঁধে

রাধবার উপায় পাওয়া গেছে। এখন আর কাকি দিয়ে গানের পাখী উড়ে যাবার জো নেই। তার ডানা কেটে তাকে মেনেজুখে খাটায় পোরবার বন্দোবস্ত করা হয়েছে। তাতে একটু শ্রীলষ্ট হলেও, সম্পূর্ণ বিনষ্ট হওয়ার চেয়ে ভাল। স্বরলিপির নানা পদ্ধতির মধ্যে শৌরীন্দ্রমোহন ঠাকুর ও জ্যোতিরিন্দ্রনাথ ঠাকুরের উদ্ভাবিত প্রণালীদ্বয়ই বেশি প্রচলিত। আজকাল অনেকে মিলে একত্রে সংগীতচর্চা করবার দিকে যে ঝোক হয়েছে, তার ফলে অনেক বহু একসঙ্গে বাজানো এবং সব সময়ে একত্রে না বাজিয়ে আলাদা আলাদা স্বরাদী সুরে বাজানোর চেষ্টাতে যুরোপীয় হারমোনি বা স্বরসন্ধির প্রভাব লক্ষিত হয়। একজন লেখক একে সংগীতের "গোড়ে মালা গাঁথা" বলেছেন, অর্থাৎ একহারী মূল সুরের সঙ্গে অস্তান্ত সুর এমনভাবে যোজনা করা, যাতে সবসুস্থ স্রুতিমধুর হয়।

কলতঃ, আমাদের যজ্ঞের উন্নতি করবার দিকে দেশের লোকের তেমন ঝোক না দেখা গেলেও, সৌভাগ্যবশতঃ গানের চর্চা থেমে যায় নি, বরং বেড়েই চলেছে। অনতিপূর্বে সংগীতকে যেমন অবহেলার চক্ষে, কিংবা কেবল পেশাদারের উপযুক্ত বলে ঘৃণার চক্ষে দেখা হত, কিছুদিন থেকে সে রেওয়াজ উঠে গেছে ও সে-অবজ্ঞার বদলে অস্বকুল হাওয়া বইতে আরম্ভ করেছে; কতকগুলি সংগীত-বিদ্যালয়ও স্থাপিত হয়েছে, সেটি সুরের বিষয়। আধুনিক বাপ-মা ছেলেমেয়েকে গানবাজনা শেখাবার জন্তে ব্যস্ত; রাতারাতি তাদের ওস্তাদ করে তুলতে চান এবং অনেক সময়ই বিবেচনা করেন না তাদের ভিতরে সে ক্ষমতা আছে কি না। যাই হোক, ঔদাসীন্ত অপেক্ষা উৎসাহ প্রের, সে বিষয় সন্দেহ কি? আমাদের দেশের জীবন্ত শিল্পকলার মধ্যে সংগীতই প্রধান, সে কথা মনে রেখে আশা করি আমাদের দেশের লোকে— বিশেষতঃ মেয়েরা—এই মোহিনী-বিদ্যার চর্চা ও উন্নতির প্রতি সমধিক লক্ষ্য রাখবেন।

এতকণ যদিও ওস্তাদী হিন্দী গানের তরফে ওকালতি করলুম, কিন্তু

অবশেষে স্বীকার করতেই হবে যে হিন্দী গান যতই ভাল হোক, বাংলা গান যেমন বাঙালীর কানের ভিতর দিয়ে প্রাণে গিয়ে পৌঁছতে পারে, অপর ভাষার গান কখনই তেমন পারে না। কারণ সুর ও কথা, এই দুই যাদুকরে মিলে তবে গানের পূর্ণ মাস্তকা সৃজন করে। সুতরাং সংস্কৃত শিখলেও যেমন তার ভিতর দিয়ে ও তাকে ছাড়িয়ে গিয়ে বাংলা ভাষা এবং সাহিত্যের অঙ্গীভূত হই বাঙালীর পক্ষে শ্রেয় ও প্রেয়; তেমনি হিন্দী গানের চর্চা আবশ্যিক হলেও শেষে বাংলা গানেই তার ফসল ফলাতে হবে, বাংলা গানকেই বাঙালীদের সকলরকম ভাবপ্রকাশের উপযোগী করে তুলতে হবে।

শ্রীহিন্দীয়া দেবী চৌধুরানী

হিন্দুসংগীত

হিন্দুসংগীত বলতে কি বোঝায়, সে-বিষয়ে সেখতে পাই প্রথমতঃ সাধারণ লোকের মনে কোনও স্পষ্ট ধারণা নেই, দ্বিতীয়তঃ পণ্ডিতে পণ্ডিতে ভীষণ মতভেদ আছে।

অনেকের বিশ্বাস, আমরা যাকে ওস্তাদী বলি, তাই হচ্ছে খাঁচি হিন্দুসংগীত।

কিন্তু নানা বিভিন্ন শ্রেণীর সংগীত এই ওস্তাদী বিশেষণের দ্বারা বিশিষ্ট; যথা ক্রপদ, খেয়াল, টপ্পা ও ঠুংরি। শুদ্ধবাণী ক্রপদ ও শোরীমিয়ার টপ্পা যে একজাতীয় সুর নয়, আমাদের দেশের গান-বাজনার দ্বারা ক-থ-মাত্র জানেন তাঁদের কাছেও তা অবিদিত নেই। সুতরাং 'ওস্তাদী' অর্থে কে কোন-জাতীয় সংগীত বোঝেন, তা স্পষ্ট করে না জানালে, এ বিষয়ে কোনরূপ সংগত বিচার করা অসম্ভব। যদি কেউ জোর করে বলেন যে, হিন্দুস্থানী-সংগীতই হিন্দুসংগীত, তাহলে দক্ষিণাপথের ব্রাহ্মণ-সংগীতচার্যেরা সমস্তরে তার প্রতিবাদ করে বলবেন—না, তা কখনই নয়, কেননা উত্তরাপথের সংগীত যখনদোষে ছুট—অতএব হিন্দুপদবাচ্য নয়।

অপরপক্ষে মুসলমান ওস্তাদজিরা বলে থাকেন যে, রাগরাগিণী সব তাঁদের ধানধানি, এমন কি সপ্তস্বর পর্যন্ত তাঁদের ঘরানা চিহ্ন। হিন্দুর মুখ থেকে ওসব বেরোর না, যদি-বা বেরোয় তাহলে তাতে 'কড়িতাতকা বদ্বু' থাকে; কিন্তু তাঁদের মুখ থেকে যা উল্লীর্ণ হয়, তাতে 'পোলাও-কোরমাকো খোসবু' থাকে। একদিকে দই-ভাত, অপরদিকে পেঁয়াজ-রসুন—এ দুয়ের মধ্যে কোনটি যে বেশি পুষ্টিগুরুময় সে বিচার তিনিই করতে পারেন—যিনি সংগীতের রূপ চিহ্ন আর না চিহ্ন, গন্ধ চেনেন। এ দেশে গীত যে অনেক গায়কের নাসারকু দিয়ে নির্গত হয়, তা জানি; কিন্তু তা যে শ্রোতাদেরও

উক্ত ছিদ্র দ্বিধে অন্তরে প্রবেশ করে, এ কথা পূর্বে জানতুম না। কলকথা, হিন্দুস্থানী সংগীত, সংগীত হতে পারে; কিন্তু হিন্দু কি না, সে বিষয়ে আচার্য ও ওস্তাদে মতের মিল নেই।

অতএব দেখা গেল যে, হিন্দুসংগীত বলতে কি বোঝায়, তা নির্ণয় করা অসম্ভব, কেননা ও-শব্দে কোনও-এক জিনিস বোঝায় না। নানা বিভিন্ন জাতীয় নানা বিভিন্ন রীতির সংগীতকে আমরা ঐ এক ছাপমারা মোড়কে পুরে দিই; হিন্দুসংগীত বলে সংগীতের এমন কোনও একটি বিশেষ টাইপও নেই—যা অচল, অটল, পরিচ্ছিন্ন ও নির্বিকার। আমাদের দেশের গানবাজনাও মুখে মুখে ও হাতে হাতে নানা রূপ ধারণ করে নানা চালে চলেছে। পরিবর্তনের নিয়ম এ ক্ষেত্রেও পূর্ণমাত্রায় কাজ করেছে। সুতরাং বর্তমানে কেউ যদি নূতন চণ্ডের সুর গড়েন কিংবা পুরোনোকে নূতন চালে চালান, তাহলে তাতে করে হিন্দুসংগীতের ধর্ম নষ্ট করা হবে না।

২

পূর্বোক্ত মতের বিরুদ্ধে অনেকে এই আপত্তি উত্থাপন করবেন যে, হিন্দু-সংগীতের বিশেষত্বই এই যে, তার কতকগুলি সুপরিচিত টাইপ আছে—যার নাম ছয় রাগ ছত্রিশ রাগিনী। এবং সেই সব রাগরাগিনীর একস্বর বদলালে হিন্দুসংগীত বিকারগ্রস্ত হয়ে পড়ে।

এ কথাটারও একটু বিচার করা আবশ্যিক। প্রথমতঃ হিন্দুসংগীতে শাস্ত্রমতে রাগরাগিনী অসংখ্য, মূল ছয় এবং তার থেকে উৎপন্ন ছয় ছক্ ছত্রিশ নয়। এ কথা যদি সত্য হয়, তাহলে ওস্তাদজিরা যে ছকা ধরে বসে আছেন, তা যে কাঁসকাগজ তাতে আর সন্দেহ নেই।

সত্য কথা এই যে, নামে ছয় রাগ ছত্রিশ রাগিনী থাকলেও, আসলে আমাদের গানবাজনার তারা নানা মূর্তিতেই দেখা দেয়। এই কারণেই তো রাগরাগিনীর ওড়াওড় নিয়ে ওস্তাদে ওস্তাদে এত মারামারি। ভৈরবীতে

কড়িমধ্যম লাগালে বাগ বজায় থাকে কি না, এ তর্কের অবশ্য কোনও অর্থ নেই। কড়িমধ্যমের স্পর্শে যদি ভৈরবীর ভৈরবীও নষ্ট হয়, তাহলে তাকে না হয় 'কৈরবী'ই বলা গেল—তাতে সে স্বর অস্বর হয়ে ওঠে না। বাংলা-বেহাগের নিখাদ কোমল ও মধ্যম শুদ্ধ, অপর পক্ষে হিন্দুস্থানী-বেহাগের নিখাদ শুদ্ধ এবং মধ্যম তীব্র। এ উভয়ের মধ্যে কোন্ স্বরটি হিন্দু আর কোন্টি অহিন্দু—এ বিচার কোন্ আদালত করবে ?

তারপরে শুদ্ধাশুদ্ধের এই বাস্তব তর্ক শুনে শুনে লোকের মনে আর-একটি ধারণা জন্মেছে যে, মিশ্র হলোই সৃষ্টি স্বরের সর্বনাশ হয়। যেমন গীতাকারের মতে বর্নসঙ্করের সৃষ্টির বাড়া পাপ নেই, তেমনি অনেক গীতকারের মতে মিশ্র স্বরের সৃষ্টির বাড়া পাপ নেই। এ ধারণা অবশ্য সম্পূর্ণ অমূলক। আমাদের ওস্তাদী চণ্ডের টপ্পা-ঠুংরির অধিকাংশ সুরই তো মিশ্র। তারপর ক্রপদ-খেয়ালের অনেক ভারি ভারি গানের সুরও যে মিশ্র, তার পরিচয় তাদের নামেই পাওয়া যায়, যথা—মেঘমল্লার, গোড়মল্লার, নটমল্লার, ইমনকল্যাণ, ইমনভূপালি, বসন্তবাহার, আড়ানাবাহার ইত্যাদি।

সুতরাং এই মিশ্র স্বরের উপরেই আমাদের সংগীতের বৈচিত্র্য ও ঐশ্বর্য প্রতিষ্ঠিত, এবং যে-সকল পূর্বাচার্যেরা স্বরের নূতন রূপ নূতন গতি দিতে পেরেছেন, যথা—গোপাল নায়ক, বৈজুবাওরা, তানসেন, সদারজ ইত্যাদি,—ওস্তাদের দল অজ্ঞাবধি তাঁদের নাম উচ্চারণ করে নিজের কান মলেন, তার পরে মুখ খোলেন।

৩

এ সব তো গেল কালোয়াতি সংগীতের কথা, শাস্ত্রে যাকে বলে 'মার্গ'। এ ছাড়া ভারতবর্ষে আর এক-জাতীয় সংগীত বহুকাল হতে চলে আসছে যার নাম 'দেশী'। উদাহরণ—বাংলার কীতন, বাউল, সারি, জারি ইত্যাদি। গাইয়ে-বাজিয়েদের দেশীসংগীতের ইচ্ছামত রূপান্তর করবার প্রচুর স্বাধীনতা

আছে, কেন না এ শ্রেণীর সংগীত কোনও বাধাবিধি নিয়মের অধীন নয়।

এ কথার প্রমাণ 'রাগবিবোধের' বক্ষ্যমাণ শ্লোক—

দেশে দেশে রচ্যা বক্ষনহস্তজন তু সা দেশী।

স তু লোকরচিবিকলিত প্রাপ্তে লক্ষ্যাত্ত দেশী তৎ।

টীকাকার উক্ত শ্লোকের এইরূপ ব্যাখ্যা করেছেন—

যে সকল গীত অবলা-বাল-গোপাল-নৃপালগণ কর্তৃক অমুরাগবশতঃ বেচ্ছায় স্বদেশে গীত হয়, তাহাকে দেশী কথা যায়। মার্গসংগীত বিবিধ—নিবদ্ধ এবং অনিবদ্ধ। যে সংগীত আলাপনিবদ্ধ, তাহা মার্গ বলিয়া প্রকীৰ্তিত। আর বাহা আলাপাদিবিহীন, তাহাই দেশী বলিয়া প্রকীৰ্তিত।

আর এক কথা—শাস্ত্রের নিয়মে বন্ধ নয় বলে, দেশী সংগীত যে সংগীতের নিয়মে বন্ধ নয়, অবশ্য তা নয়। রাগবিবোধ গ্রন্থের উদ্দেশ্যই এই প্রমাণ করা যে, মার্গ এবং দেশীসংগীতে আসলে কোনও বিরোধ নেই। গ্রন্থকারের নিজের কথা এই "রাগবিবোধঃ বিদধে বিরোধ রোধায় লক্ষ্যলক্ষণয়ো"। উপরোক্ত বাক্যে লক্ষ্য অর্থ দেশী এবং লক্ষণ অর্থে মার্গ। এ দুয়ের মধ্যে যে বিরোধ নেই শুধু তাই নয়,—টীকাকারের মতে দেশীসংগীত মার্গ-সংগীতেরই একটি বিশেষ শাখা। এ শাখাকে যদি কেউ কাঁচা ডাল বলেন, তাতে আমার আপত্তি নেই; কিন্তু তাই বলে সেটিকে যে ভাঙতেই হবে, এমন কোনও বিধি শাস্ত্রে নেই।

অতএব দেখা গেল যে, শাস্ত্রমতেও দেশীসংগীত আলাপাদিবিহীন হওয়ার দরুন বিদেশী হয়ে পড়ে না। সুতরাং দ্বিজেন্দ্রলাল রায় এবং রবীন্দ্রনাথ ঠাকুর মহাশয়ের গান আলাপনিবদ্ধ নয় বলে যে তা হিন্দুসংগীত নয়, এ হতেই পারে না,—নচেৎ রামপ্রসাদী সুরকেও অহিন্দু বলতে হয়।

সুতরাং এ কথা নির্ভয়ে বলা যেতে পারে যে দেশীসংগীতও হিন্দুসংগীত এবং নর্তনে কীৰ্তনে সে তার প্রাণের নিতানূতন পরিচয় দিচ্ছে। এতে আশ্চর্য হবার কিছুই নেই, কেননা রাগবিবোধের টীকাকার কল্পিনাথ—

সম্ভবতঃ ইনি কলিনাথের সহোদর—বলেছেন, দেশীসংগীত কামচারী। এ সংগীত অবশ্য সর্বাঙ্গসুন্দর নয়। রবীন্দ্রনাথ তাঁর প্রবন্ধে এই দেশীসংগীতের হালচাল লক্ষ্যে বলেছেন—

প্রথম চাগটা সর্বাঙ্গসুন্দর নয়, তার অনেক ভঙ্গি হান্তকর এবং কুশী। কিন্তু সবচেয়ে আশার কথা—সে চলতে শুরু করেছে, সে বীধন মানছে না।

দেশীসংগীতের প্রাণ আছে বলে তার ক্ষুতি কেউ বন্ধ করতে পারবে না, এবং করাও উচিত নয়। কালক্রমে আমাদের এই দেশীসংগীত হয়ত এক অপূর্ব মার্গসংগীতে পরিণত হবে—এ আশা অন্তত আমরা রাখি।

8

যদি এদেশে কোনও সর্বাঙ্গসুন্দর সংগীত থাকে, আমার মতে সে হচ্ছে ঐ পূর্বোক্ত মার্গসংগীত। সকলপ্রকার দেশীসংগীতের অপেক্ষা এই মার্গসংগীত আমার কানে সবচাইতে বেশি মিষ্টি লাগে, আমার মনকে সবচাইতে বেশি আনন্দ দেয়, আমার হৃদয়কে সবচাইতে বেশি স্পর্শ করে। এ সংগীতে ভারতবর্ষের কোনও প্রাচীন দেশীসংগীতের একটি বিশেষ ধারা পূর্ণ পরিণতি লাভ করেছে। প্রাকৃতিক হিসাবে সংস্কৃতের যে স্থান, দেশীসংগীতের হিসাবে মার্গসংগীতেরও সেই স্থান। এ পরিণতির অন্তরে যুগ-যুগান্তরের সংগীতসাধকদের সাধনা সঞ্চিত রয়েছে। অনেকের বিশ্বাস রাজার আজ্ঞায় রাজদরবারে এর সৃষ্টি। আমার ধারণা এ বিশ্বাস সম্পূর্ণ অমূলক। এমন পূর্ণাবয়ব এবং সর্বাঙ্গসুন্দর সংগীত কেউ ফরমায়েশ দিয়ে রাতারাতি গড়িয়ে নিতে পারে না। বিশেষতঃ কোনও রাজারাজড়া ত নয়ই। কলিনাথ সংগীতের গান লক্ষ্যে নৃপালকে ত গোপালের দলেই ফেলেছেন।

এ যুগে এই উচ্চ অবস্থার সংগীতের আদর যে ক্রমে কমে আসছে, সে বিষয়ে সন্দেহ নেই। সুতরাং এই দুর্গতির কারণ নির্ণয় করবার চেষ্টা করা দরকার। রাগ-আলাপ শুনে একালের শুধু ছেলেরা নয়, বুড়োরাও যে হাসে—

এর চাক্ষুষ পরিচয় আমরা নিত্যই পাই। কিন্তু সে কার দোষে—শ্রোতার না গায়কের? আমার বিশ্বাস এর অল্প উভয় পক্ষই সমান দোষী।

এমন ঋপদী নিত্য দেখা যায় যিনি কোনও ঋপদের একপদ পর্বন্ত অগ্রসর না হয়েই তালের ডনবৈঠক করতে শুরু করেন। কালোয়াতি ভাবায় এর নাম ভাগবাঁট করা। তখন সুর থাকে পড়ে, আর ওস্তাদজির কণ্ঠ থেকে বা নিঃসৃত হয় তা সংগীতের হ ব ব র ল ছাড়া আর কিছুই নয়। এঁরা ভুলে যান যে ঋপদের প্রধান গুণ হচ্ছে তার repose। গায়ক যদি ঋপদের গাঙ্গীর্ষ নষ্ট করেন, তাহলে শ্রোতার যদি তাঁদের গাঙ্গীর্ষ রক্ষা করতে না পারেন— তাতে তাঁদের দোষ দেওয়া যায় না।

তারপর খেরালীদের কীর্তিকলাপ আরও অদ্ভুত। এরা মুখ না খুলতেই তান বেরতে শুরু করে। আমি অবশ্য তানের বিরোধী নই। সংগীতে যে সরল রেখা ব্যতীত অন্য কোনও রেখার ব্যবহার দৃশ্যীয়—এরূপ আমার বিশ্বাস নয়। ঋপদ ইউক্লিডের প্রথম অধ্যায় এবং দ্বিতীয় অধ্যায়ের মধ্যেই আবদ্ধ,—খেরাল তার থেকে মুক্তি লাভ করে তার তৃতীয় অধ্যায় অধিকার করে বসেছে। চিত্রকলাতেও দেখা যায়, আদিম চিত্রকরদের সরলরেখাই হচ্ছে একমাত্র সম্বল। পরে উচ্চ কলার ক্রমবিকাশের ফলে সে-রেখা বাঁকে চোরে, ঘোরে ফেরে। আমার ধারণা এরূপ হওয়াটা উন্নতিরই লক্ষণ। এমন কি ঋপদীরাও মুখে না হোক, কার্যতঃ এ সত্য মেনে চলেন। মিড় দেওয়ার অর্থই হচ্ছে সুরের কোণ মেরে দেওয়া। যদিচ আমি তানের একান্ত পক্ষপাতী, তবুও একালের খেরালীরা তানের যেরূপ অপপ্রয়োগ এবং ছুটপ্রয়োগ করে থাকেন, তা আমার কানেও অসহ্য। তান করতপ ইত্যাদিকে সংগীতের অলংকার বলা হয়। অলংকারের উদ্দেশ্য অবশ্য দেহের শোভাবৃদ্ধি করা, চেকে ফেলা নয়। খেরালীদের প্রযুক্ত অলংকারের প্রৌচুর্ষ এবং অসংগত ও অযথা বিস্তারের ফলে লোকে সুরের চেহারা প্রায়ই দেখতে পার না। কতকগুলো টুকরোর সমষ্টিতে সংগীতের রূপ অস্বাভাবিক করে না, কেননা সে রূপ হচ্ছে অস্বাভাবিক

ও সমগ্র। পূর্বোক্ত শ্রেণীর খেয়ালীরা সংগীতের রূপের সঙ্গে তার রসও নষ্ট করেন। স্তবরাং সে-গানে যে লোকে রস পায় না, তাতে আর আশ্চর্য কি ? সুরের কুচিমোড়া-ভাঙা ও ভিগবাজি-খাওয়া অত্যাশ্চর্য ব্যাপার হলেও সংগীত নয়; কেননা সংগীত বাজি নয়, জাহ্নু।

দেহীমাজেরই রূপ কেবলমাত্র দেহের রেখার স্ফুটনের উপর নির্ভর করে না—তদুপরি বর্ণও চাই। বর্ণ শুধু রূপকে প্রকাশ করে না—সেই সঙ্গে তার অন্তর্নিহিত প্রাণেরও পরিচয় দেয়। স্বরই হচ্ছে সংগীতের বর্ণ। কেন জানি নে অধিকাংশ ওস্তাদ তাঁদের কণ্ঠস্বরকে অতিশয় কর্কশ করে তোলেন। বাণী বীণাপানি প্রকৃতি-মুখরা বটে, কিন্তু তিনি যে কর্কশ—এ সত্য ওস্তাদজিরা কোথা থেকে উদ্ধার করলেন ? এমন খেয়ালীও ছুপ্রাপ্য নয়, যাদের একটি তান বার করতে কণ্ঠের প্রসববেদনা উপস্থিত হয়। কেউ কেউ বা তান গাঁজার খোয়ার মত নাক দিয়ে ছাড়তে বাধ্য হন। সুরের উৎপত্তিস্থান কণ্ঠ, মূর্ধা, মণিপদ্ম, নাভিপদ্ম যেখানেই হোক না, তার বহিষ্করণের পথ যে নাসিকা—এ কথা কোনো শাস্ত্রেই বলে না।

উচ্চ অঙ্গের সংগীতের উপর এইরূপ অত্যাচার করার প্রধান কারণ, কলাবতেরা ভুলে যান যে সংগীত আর্ট, সায়াল নয়—এবং সংগীতের উদ্দেশ্য প্রোতাকে আনন্দ দেওয়া, নিজের মূখস্থ বিস্তার দৌড় দেখানো নয়। এই সংগীতের বিস্তে দেখাতে গিয়ে তাঁদের শুধু বিস্তেই বেরিয়ে পড়ে। ফলে আনাড়ির দল হামে, আর সুরেলা লোকেরা চটে।

৫

এই pedantryর দোষে, এক pedant-এর দল ছাড়া অপর সকলের কাছে উচ্চ অঙ্গের সংগীত হয় উপেক্ষা নয় অবজ্ঞার বস্তু হয়ে উঠেছে। এ অবস্তা অতিশয় দুঃখের বিষয়, কেননা পূর্বেই বলেছি যে আমার মতে এই শ্রেণীর সংগীতেই ভারতবর্ষের সংগীত তার পূর্ণত্ব, পূর্ণপরিণতি লাভ করেছে।

সুতরাং এ সংগীত শিক্ষা করতে গেলে বেশির ভাগ লোকেই কেন আর্টিস্ট না না হয়ে pedant হয়ে ওঠে—তার কারণও নির্ণয় করবার চেষ্টা করা আবশ্যিক।

আর্টের রাজ্যের অপূর্ণ কীর্তিগুলিকে অমর করবার ইচ্ছা মানুষের পক্ষে নিতান্ত স্বাভাবিক। ভার্য ও স্থাপত্যের কীর্তিগুলি সব নিজের জোরেই দাঁড়িয়ে থাকে—কেননা ও-সকল আর্টের উপাদান কঠিন জড়পদার্থ। যে আর্টের উপাদান শব্দ, সেই আর্টকে রক্ষা করবার উপায়, হয় তাকে কণ্ঠস্থ নয় লিপিস্থ করা। যতদিন না মানুষে অক্ষরের আবিষ্কার করে, ততদিন কাব্য কিংবা সংগীত কণ্ঠস্থ করে রাখা বাতীত তা রক্ষা করবার উপায়ান্তর নেই।

আমাদের দেশে স্বরলিপি ছিল না বলে, আবহমানকাল সংগীত কণ্ঠস্থ করেই রক্ষা করা হচ্ছে। সুতরাং কোন একটি সর্বাঙ্গসুন্দর গীতকে উক্ত উপায়ে রক্ষা করতে হলে, কণ্ঠস্থকারকে তার একসুরও বদল করবার অধিকার দেওয়া যেতে পারে না; যেমন বেদমন্ত্রের এক অক্ষরও বদল করবার অধিকার সেকালে বেদজ্ঞ ব্রাহ্মণকে দেওয়া হয় নি। লিপিকারকে ইচ্ছামত শব্দগুলার পরিবর্তন করবার স্বাধীনতা কোনও কাব্যভক্ত লোক দিতে পারেন না। তানসেনের দরবারী-কানাড়া যদি রক্ষা করতে হয়—তাহলে তাঁর অপেক্ষা নিকট গায়ককে তার অঙ্গহানি করবার অধিকারে বঞ্চিত করতে হয়। সংগীতকে এইভাবে কণ্ঠস্থ করে রক্ষা করবার সুফল হয়েছে এই যে, পূর্বাচার্যদের রচিত অনেক গান আজও শরীরে বর্তমান আছে। যথার্থ আর্টিস্টের হাতে পড়লে সে শরীরে আবার প্রাণ প্রতিষ্ঠিত হয়।

অপর পক্ষে এর কুফল হয়েছে এই যে, আমাদের গুণীর দল সব অল্পবিস্তর pedant হয়ে পড়েছেন; প্রাণ দূরে থাক, সংগীতের দেহ পর্বস্তও তাঁদের কাছে উপেক্ষণীয়, তাঁরা শুধু তার কঙ্কাল নিয়েই নাড়াচাড়া করেন।

সংগীতের সঙ্গে কাব্যের প্রভেদ এই যে, কাব্য যে-খুশি সেই মুখস্থ

করতে পারে, কিন্তু সংগীত অধিকারী ব্যতীত অপর কেউ কণ্ঠস্থ করতে পারে না। যার ভগবৎগান গানের গলা ও সুরের কান নেই, সে হাজার পরিশ্রম করেও ও-বস্তু 'আদায়' করতে পারে না। এ ক্ষেত্রে composer তো আর্টিস্টই, এবং যে ব্যক্তি আর্টিস্ট হবার ক্ষমতা নিয়ে জন্মায় নি, সে executant হতে পারে না।

কিন্তু স্বরলিপির অভাবে এ দেশে executantকে তার সমস্ত মনটাকে নিভুল ভাবে কণ্ঠস্থ করবার দিকেই দিতে হয়; ফলে তার ভিতরকার আর্টিস্ট স্বাধীনতার অভাবে পঙ্গু হয়ে যায়, আর সেই সঙ্গে মুখস্থকার প্রবল হয়ে ওঠে। এই কারণেই রাগরাগিণীর শুদ্ধাশুদ্ধির বিচার নিয়ে, ওস্তাদে ওস্তাদে এত কোত্তাকুস্তি এত ধ্বস্তাধ্বস্তি। কে কত ভাল মুখস্থ করেছে, কে কত মাছিমাঝা নকল করতে পারে, তার উপরেই তার কৃতিত্ব নির্ভর করে। যিনি কাব্য-মুতের রসান্বাদ করেছেন, তাঁর কাছে ব্যাকরণের কুটতর্ক জন্মন অগ্রীতিকর,— যিনি সংগীতরসের রসিক, তাঁর কাছে সংগীতবিজ্ঞার কচকচিও তেমনি বিরক্তিকর। যারা কবি হয়ে জন্মেছে, তারা বৈয়াকরণ হতে বাধ্য হলে কাব্যের যে সর্বনাশ হয়—যারা আর্টিস্ট হয়ে জন্মেছে, তারা ওস্তাদ হতে বাধ্য হলে সংগীতেরও সেই সর্বনাশ হয়। স্বরলিপি থাকার দরুন ইউরোপের গাইয়ে-বাজিয়েদের এ বিপদে পড়তে হয় নি। মোজার্ট বেটোভেনের রচিত সংগীত যে কি, তা নিয়ে গুণীর দলকে মারামারি করতে হয় না, কারণ যার খুশি তিনিই তা স্বচক্ষে দেখে নিতে পারেন। সেই লিপিবদ্ধ সংগীতকে সুরে অনুবাদ করা এবং সেই সঙ্গে তাকে সজীব করে তোলার ক্ষমতার উপরেই সে-দেশের ওস্তাদদের কৃতিত্ব নির্ভর করে।

কি চিত্তে, কি কাব্যে, কি সংগীতে—আর্টিস্টমাত্রেই নববস্তুর স্রষ্টা। সুতরাং আর্টের যে শিক্ষাপদ্ধতি আর্টিস্টকে নববস্তুর সৃষ্টির পথে বাধা দেয়, সে শিক্ষা

আর্টের উন্নতির পথ রোধ করে। আমাদের দুর্ভাগ্যবশতঃ আমাদের দেশে সংগীতশিক্ষার পুরো বোঁকটা পুনরাবৃত্তির উপরেই পড়েছে। স্মৃতরাং মার্গ-সংগীতে এ দেশে নব নব রাগরাগিণীর সৃষ্টি বহুকাল থেকে একরকম বন্ধ হয়ে গেছে। আমরা composer হবার অধিকারে বঞ্চিত হয়েছি। শকুন্তলা সংস্কৃত নাটকের শীর্ষস্থান অধিকার করে আছে বলে সংস্কৃত কবিরা যদি তারই আবৃত্তি ও অনুবৃত্তি করাই তাঁদের একমাত্র কর্তব্য বলে মনে করতেন, তাহলে উত্তররামচরিত রচিত হত না। আর্টিস্টকে কিন্তু একেবারে গতানুগতিকের দাস করা যেতে পারে না, স্মৃতরাং সুরের নূতন মূর্তি গড়বার অধিকার থেকে বঞ্চিত হয়ে আমাদের দেশের গুণীর দল তাদের সকল রচনাশক্তি অলংকারের বৈচিত্র্য-সাধনের উপরেই প্রয়োগ করেছে। এর সুফল হয়েছে এই যে, বাঁধা ঠাটের হাত থেকে কথকিং মুক্তি লাভ করে মার্গসংগীত ত্বরঙ্গিত হয়ে উঠেছে। অপর পক্ষে তার সুফল হয়েছে এই যে, রাগরাগিণী কাণ্ডজ্ঞানহীন খেয়ালীর হাতে পড়ে অলংকারের অন্তরে অন্তহিত হবার সুযোগ পেয়েছে। ঋপদে তানের স্থান নেই, স্মৃতরাং ও-গানে ওস্তাদী দেখাতে হলে তালের গুণ-ভাগ করা ছাড়া উপায়ান্তর নেই। অপর পক্ষে খেয়ালের তাল ঠেকায় গিয়ে দাঁড়ানোতে সে গানে ওস্তাদী দেখাতে হলে তানের যোগ-বিয়োগ করা ছাড়া উপায়ান্তর নেই। ফলে মার্গসংগীতের গুণীপনা এখন তাল ও সুরের আঁক-কষাতে পরিণত হয়েছে। সে-আঁক যে যত জলদি কষতে পারে, সে তত মার্ক পায়। স্মৃততালের শুভংকরী যে সংগীতের পক্ষে শুভকরী নয়— এ অতি সোজা কথা।

১

তবে সত্যের খাতিরে এ কথা আমাদের স্বীকার করতেই হবে যে, গায়ক যদি পণ্ডিত না হয়ে যথার্থ আর্টিস্টও হন—এবং গাইয়ে-বাজিয়েদের দলে আর্টিস্টের আজও কোনো অভাব নেই—তাহলেও আমাদের দেশের এ যুগের

বেশির ভাগ ছেলেবুড়ো তাঁর গান শুনে না হাসুন, গভীর হয়ে যাবেন—অর্থাৎ তাতে তাঁরা ক্রেশ বোধ করবেন। এর জন্য দোষী অবশ্য শ্রোতার দল। এরূপ হবার কারণ কি এই নয় যে, যাকে আমরা ‘মিউজিক্যাল ফিলিং’ বলি তাতে অধিকাংশ লোক বঞ্চিত? গানবাজনার আমাদের মনে যে ‘ফিলিং’ এনে দেয়—তা যে, আমরা যাকে সুখহুঃখ বলি তা হতে সম্পূর্ণ বতস্ত—এ জ্ঞান সংগীত-প্রাণ লোকমাত্রেই আছে। যাদের অন্তরে ‘মিউজিক্যাল ফিলিং’ নেই, তাঁদের কাছে অবশ্য এ কথা গ্রাহ্য নয়, এবং কোনোরূপ যুক্তিতর্কের দ্বারা এ-মতের যাথার্থ্য প্রমাণ করাও অসম্ভব। পৃথিবীতে এমন কি যুক্তিতর্ক আছে, যার সাহায্যে অন্ধকে রূপের জ্ঞান দেওয়া যেতে পারে? মিউজিক্যাল ফিলিং এর স্বাতন্ত্র্য তর্কের দ্বারা প্রমাণ না করতে পারলেও তার স্বরূপ আমরা বর্ণনা করতে পারি, এবং আমি যতদূর-সম্ভব সংক্ষেপে এই বিশিষ্টতার পরিচয় দিতে চেষ্টা করব।

আমাদের দেশের নব্য-আলঙ্কারিক মতে—

রসপীয়ার্থপ্রতিপাদকঃ শব্দঃ কাব্যম্।

পূর্বোক্ত বাক্যের ব্যাখ্যা নিয়ে উদ্ধৃত করে দিচ্ছি—

রসপীয়ার্থা চ লোকোত্তরাহ্লাদজনক-জ্ঞানগোচরতা। লোকোত্তরং চাহ্লাদগতচমৎকারত্বাপর পর্যায়োন্মত্তব সাক্ষিকো জ্ঞাতিবিশেষঃ। কারণং চ উদবচ্ছিন্নে ভাবনাবিশেষঃ পুনঃপুনরনুসংধানান্বা। “পুত্রস্তে জাতঃ,” “ধনং তে দাত্তামি” ইতি বাক্যার্থধিগম্যস্তাহ্লাদস্ত ন লোকোত্তরস্তম।

—রসগঙ্গাধর

অর্থাৎ, যে শব্দদ্বারা আমাদের মনে লোকোত্তরাহ্লাদ অন্তে, তাই কাব্য। লোকোত্তরাহ্লাদ একটি বিশেষ-জাতীয় আহ্লাদ এবং সে-আহ্লাদের একমাত্র সাক্ষী হচ্ছে অমৃতভূতি। ‘তোমার ছেলে হয়েছে’ ‘তোমাকে টাকা দেব’—এ কথা শুনে লোকের মনে যে আহ্লাদ হয়, সে অবশ্য লোকোত্তরাহ্লাদ নয়। রসগঙ্গাধরের টীকাকার বলেন—‘অমৃতভব সাক্ষিক’ এই কথা বলার,

অন্ত প্রমাণের নিরাস করা হয়েছে। এবং সে অসুভব কার ?—না সহস্র লোকের।

কাব্য হতে আমরা যে আনন্দ পাই তা যে একটি 'বিশেষ জাতীয়' আনন্দ এবং তা যে আমাদের লৌকিক আনন্দের পর্যায়ভুক্ত নয়—এ বিষয়ে অবশ্য কোনই সন্দেহ নেই। তবে কাব্যের আনন্দ যে 'বাক্যার্থবিজ্ঞ' নয়, এ কথা অবশ্য সম্পূর্ণ সত্য নয়। কেননা কাব্যে আমরা অর্থহীন শব্দ ব্যবহার করি নে; সুতরাং কাব্যের "ভাবনা" আমাদের ব্যবহারিক মনের অতিরিক্ত হলেও সম্পূর্ণ বহির্ভূত নয়। কাব্য আমাদের লৌকিক সুখদুঃখের সঙ্গে এতটা জড়িত যে, কাব্যরস যে পৃথক এবং স্বতন্ত্র বস্তু, একথা মানুষে সহজে স্বীকারও করে না, ধরতেও পারে না।

সংগীতের আনন্দ যে শুধু আংশিকভাবে নয়, সম্পূর্ণরূপে লোকোত্তরাহ্লাদ, সংগীত-রস যে আমাদের হৃদয়-রসের বিকারমাত্র নয়, এ সত্য গ্রাহ্য করবার পক্ষে তেমন কিছু বাধা নেই। সংগীতেও শব্দ আছে, কিন্তু সে শব্দের কোনো লৌকিক অর্থ নেই। সংগীতের ভাষা আমাদের "কানের ভিতর দিয়া মরমে প্রবেশ করে", কিন্তু মস্তিষ্কের পথ ধরে নয়; অর্থাৎ সংগীত আমাদের বুদ্ধিবৃত্তির অধীনও নয়, গ্রাহ্যও নয়। সুতরাং সংগীত-রস যে কেবলমাত্র অহুত্বত্বসাপেক্ষ, তার স্পষ্ট পরিচয় যন্ত্রসংগীতে পাওয়া যায়। যার বীণ কি বেহালা শুনে প্রাণ আকুল না হয়ে ওঠে, তাঁর প্রাণে সংগীত নেই। গায়কের রাগরাগিনীর আলাপও ঐ যন্ত্রসংগীতেরই সামিল; তফাৎ এইটুকু—এ স্থলে যন্ত্র হচ্ছে কণ্ঠ,—তাঁত কিম্বা তার নয়। গীত, আমার বিশ্বাস, যে-পরিমাণে সংগীত হয়ে ওঠে, সেই পরিমাণে তাতে কথার প্রাধান্য কমে আসে।

মার্গসংগীতের চাইতে দেশীসংগীত যে চেয়ে বেশি লোকপ্রিয়, তার কারণ এ নয় যে দেশীসংগীত সহজ, ও মার্গসংগীত কঠিন। দেশীসংগীতে কথার প্রাধান্য থাকার দরুন তা এত 'জনহৃদয়ক'। যারা সংগীতপ্রাণ নন তাঁরাও লৌকিক অর্থে অতি সহস্র ব্যক্তি হতে পারেন। এই শ্রেণীরই ব্যক্তির দেশী

সংগীতের কথা রসে মুগ্ধ হন। সে কথা সুরসংযোগে উচ্চারিত হয় বলে সম্ভবতঃ তাঁদের ইন্দ্রিয়ের দ্বারে একটু বেশি করে যা দেয়, আর সেই কারণে তাঁদের হৃদয়ের কপাট একটু বেশি কাঁক হয়ে যায়। এ-সত্যের প্রকৃষ্ট উদাহরণ বাংলার কীর্তন। কিন্তু তাঁরা যে আনন্দ অমুভব করেন, সে পূর্ণমাত্রায় সংগীতগত আনন্দ নয়। জনসাধারণের মতে গান কাব্যেরই একটি অঙ্গ। কারো মতে সেটি উঁচুদের, কারো মতে নিচুদের, এই যা তফাত।

শাস্ত্রমতে সংগীতকেও কাব্যের মত বীর, করুণ, শাস্ত্র প্রভৃতি নানা রসের আধার বলে করনা ও বর্ণনা করা হয়েছে। আর বীণে ভৈরবীর আলাপ শুনে যে চোখে জল আসে, এ বিষয়ে আমি নিজে সাক্ষী দিতে পারি। অতএব ভৈরবীকে করুণরসাত্মক বলায় আমার আপত্তি নেই—যদি আমরা মনে রাখি যে ভৈরবী শুনে আমাদের মনে পুত্রশোক উপস্থিত হয় না, যা হয় তা বিশুদ্ধ আনন্দ। আমাদের ব্যাবহারিক জীবনের শোকচুঃখের সঙ্গে তার কোনোই সম্পর্ক নেই। মাহুষের ভাষা তার ব্যাবহারিক জীবনের প্রয়োজন অনুসারেই গড়ে উঠেছে এবং সেই ভাষাই মাহুষের একমাত্র সম্বল। সুতরাং যে-সকল ‘ভাবনা’ ব্যাবহারিক মনের বস্তু নয়, তার নামকরণ করতে হলে, আমরা তাদের গায়ে আমাদের জানা কথাগুলির ছাপ মেরে দিই। এ নামকরণ অবশ্য কতকটা সাদৃশ্যমূলক। তারপর সংগীতরসে করুণ বীর প্রভৃতি মনোধর্মের আরোপ যে উপমামাত্র, এ কথা আমরা বিলকূল ভুলে যাই। মাহুষের ভাষা হচ্ছে প্রধানতঃ গেরহালির ভাষা—সে ভাষার সংগীত-রসের কোনও নাম নেই। অভিনবগুপ্ত বলেছেন যে, কাব্যরসের একমাত্র নাম হচ্ছে ‘কে’পি’—অর্থাৎ ‘কি জানি কি।’ কাব্যরসলব্ধে যাই হোক, সংগীত-রসের ‘কে’পি’ ছাড়া আর নাম নেই এবং হতে পারে না। ধর্মের দ্বায় আর্টেরও মর্ম, ‘নেতি নেতি’ ছাড়া অপর কোনও উপায়ে প্রকাশ করা যায় না। আমাদের বিশ্ব-বিজ্ঞানের পেশাদারী শিকার প্রসঙ্গে আমরা সাংসারিক লাভ-লোকসানের হিসেব থেকে কাব্য বলা, সংগীত বলা, সবই যাচাই করে নিতে চাই।

আর্টিষ্টিক নাস্তিকতায় শিক্ষিত সস্ত্রীনায়েব মন পরিপূর্ণ হয়ে উঠেছে, সুতরাং মার্গসংগীত লোকপ্রিয় নয় বলে চূঃখ করার কোন ফল নেই। যারা সংগীত-রসের রসিক নয়, তাদের কাছে আসলে কোনো সংগীতই প্রিয় নয়। এ-সব কথা বলার উদ্দেশ্য এই প্রমাণ করা যে, অধিকাংশ লোক সংগীতরসের রসিক নয় বলেই মার্গসংগীত লোকপ্রিয় নয়।

যারা বলেন মার্গসংগীত কঠিন বলে তার আদর নেই, আমি তাঁদের সঙ্গে একমত হতে পারছি নে। যদি কঠিন বলার অভিপ্রায় এই হয় যে, না শিখে কেউ তা হাতে গলায় বার করতে পারেন না এবং সংগীত-বিষয়ে নৈসর্গিক সংস্কারের অভাবে হাজার মেহনত করেও কেউ তা যথার্থ আয়ত্ত করতে পারেন না, তাহলে আমি বলব যে দেশীসংগীত সহজে ঐ একই কথা খাটে। কীর্তন গাওয়া খেয়াল গাওয়ার চাইতে কিছু কম কঠিন নয় এবং রূপন-গাওয়ার চাইতে বেশি শক্ত। উভয় জাতীয় সংগীতেরই টেকনিক আছে, এবং বিনা সাধনায় সে টেকনিক স্ববশে আনা যায় না।

আসল কথা, পৃথিবীতে এমন কোনও বিজ্ঞা নেই যাকে সহজ কিংবা কঠিন বলা যেতে পারে, কারণ একজনের কাছে যা কঠিন, আর একজনের কাছে তা সহজ। দার্শনিক গ্রন্থমাত্রেই কাব্যগ্রন্থের চাইতে কঠিন নয়। হাবার্ট্ স্পেন্সারের First Principles এর অপেক্ষা মেরেডিথের Egoist চের বেশি শক্ত, এবং ব্রাউনিং এর কবিতার তুলনায় মিলের দর্শন জল। আর যে জিনিস বোঝা যত কঠিন তা যে তত শ্রেষ্ঠ, এ কথাও সত্য নয়,—নচেৎ স্বীকার করতে হবে যে বেদান্তের 'ভাসতী টীকা' শংকর-ভাস্করের অপেক্ষা চের শ্রেষ্ঠ। প্রকাশ করবার অক্ষমতার দরুনও অনেক সময়ে বিষয় কঠিন হয়ে ওঠে। কাব্যের সঙ্গে দর্শনের কিছু কোনই তুলনা হতে পারে না, কেননা এ দুই-ই হচ্ছে মনোজগতের বিভিন্ন রাস্যের বস্তু। দর্শন বিজ্ঞান এক পর্যায়, আর আর্ট হচ্ছে জুরা চিত্র। সুতরাং কোন কোন কাব্যরসের রসিকের নিকট দর্শন যেমন অপ্রিয়, কোন কোন দর্শন-রসের রসিকের নিকট কাব্য

তেমনি অগ্রিম। লোকের প্রকৃতি বিভিন্ন, রুচি বিভিন্ন। ভগবান সব মানুষকে এক ছাঁচে গড়েন নি, তা বলে কি করা যাবে? অবশ্য এক শ্রেণীর লোক আছেন যারা 'খোদার উপর খোদকারি' করতে চান—তাঁদের সঙ্গে তর্ক করার মজুরি পোষায় না। মোক্ষা কথা এই যে, অনধিকারীর নিকট সকল বস্তুই কঠিন।

যা বিনা আশ্রমে আদার করা যায়, যদি ভারই নাম সহজ হয়, তাহলে—আমি একবার নয়, একশবার বলব—সংগীতশিক্ষা সহজ নয়। কেননা অপর সকল আর্টের অপেক্ষা সংগীতে টেকনিকের প্রাধান্য বেশি। যে উপাদান নিয়ে আর্টিস্টকে কাঙ্ক্ষার করতে হয়, সেই উপাদানের সকল জড়তা, সকল অবাধ্যতা অতিক্রম করবার কৌশলেরই নাম টেকনিক। যার প্রাণে স্বর আছে, সেই স্বরকে প্রকাশ করতে হলে তার কণ্ঠ ও যন্ত্রকে সম্পূর্ণরূপে নিজের বাধ্য করতে হয়। যেহেতু বাহ্য জগতের উপাদানগুলি সহজে বাগ মানে না, সুতরাং সেগুলিকে স্বল্পে আনতে হলে যত্ন চাই, পরিশ্রম চাই, অভ্যাস চাই,—এক কথায় সাধনা চাই। সুতরাং মানুষের মিউজিক্যাল ফিলিং নিয়ে জয়গ্রহণ করলেও, চর্চার অভাবে বা দোষে তা নষ্ট করতে পারে। বর্তমানে বেশির ভাগ লোক সংগীতচর্চা করেন না, সুতরাং অনেকের অন্তর্নিহিত সংগীত-বীজ চর্চার অভাববশতঃ প্রতিকূল আবহাওয়ার মধ্যে মারা যায়। এই যত্ন পরিশ্রম কিন্তু আমাদের পক্ষে কষ্টকর জিনিস নয়—আনন্দের জিনিস। বাইরের বাধাকে অতিক্রম করা, তার উপর নিজের প্রভুত্ব-স্থাপন করবার চেষ্টাতেই ত আমরা নিজের শক্তির পরিচয় পাই এবং সেই সঙ্গে সুখ পাই। বাধা যত বেশি প্রবল, তাকে অতিক্রম করবার সুখও তত বেশি। সাধনার মধ্যে নিত্য নূতন আনন্দ পাওয়া যায়; সে হচ্ছে নিত্যনূতন শক্তি উদ্বোধনের ও সফলের আনন্দ। সুতরাং যথার্থ সাধনপদ্ধতি কঠিনও নয়, কষ্টকরও নয়। যিনি যে বিষয়ের সাধনাকে কষ্টকর মনে করেন, তিনি সে বিষয়ে অনধিকারী; সুতরাং তাঁর পক্ষে সে সাধনা যে-পরিমাণে কষ্টকর, সে-পরিমাণে ত্যাগ।

‘নায়মায়া বলহীনেন লভ্যঃ’ এ কথা আর্ট সম্বন্ধেও খাটে। দুর্বলের পক্ষে সাধনামাত্রই শুধু কঠিন নয়—ভয়াবহ; এবং আলস্য দুর্বলতা ছাড়া আর কিসের পরিচয় দেয়? আমরা যে কি সাহিত্যে কি সংগীতে অনেক জিনিস হেসে উড়িয়ে দিই, তার কারণ সে সব আমরা হেসে উড়িয়ে নিতে পারি নে।

আর একটি কথা, আর্টকে সার্বজন হিসেবে যদি শেখানো হয়, তাহলে সাধনপদ্ধতির দোষে সে শিক্ষা যে নিরানন্দ হয়ে পড়বে, তাতে আর আশ্চর্য কি? কলে সাধনমার্গ কঠিন না হোক, এ-কেন্দ্রে শুধু হয়ে উঠেছে। যারা শুধু-গেলা-গোছ করে গান শেখেন, তাঁদের গান শুনেতে লোকের শুধু-গেলার ভোগই কুসতে হয়। সুতরাং আমাদের দেশে সংগীতের চর্চা যে করে যাচ্ছে, তার অল্প শুকশিখ্য উভয়েই দোষী। কোন্ কেন্দ্রে কে বেশি দোষী তা, কে-শুক ও কে-শিখ্য তারই উপর নির্ভর করে। শুকশিখ্য উভয়েই যদি আর্টিস্ট হন, তাহলে ‘গজদন্ত কনকে অড়িত’ হয়, নচেৎ সংগীতের শুধু গজদন্ত বেরিয়ে পড়ে।

শ্রোতাদের আলস্য ও গায়ক-বাদকদের ব্যায়াম, এই দুয়ের প্রসাদে মার্গ-সংগীত ঘুমিয়ে না থাক—ঝিমিয়ে পড়েছে। বিলাতী-সংগীতের কাঠির স্পর্শে সে গা-ঝাড়া দিয়ে উঠবে কি-না তা আমি বলতে পারি নে, কেননা সে কাঠি সোনার কি রূপোর তা আমি জানি নে। এইমাত্র আমি জানি যে, দেশী মার্গ সকল প্রকার গানবাজনা আমার কানে স্বদেশী বলেই ঠেকে এবং সকল প্রকার ইউরোপীয় সংগীত বিদেশী বলেই ঠেকে। এ প্রভেদের মূল আবিষ্কার করতে না পারলে, বিলাতী সংগীতের দ্বারায় স্বদেশী সংগীত জেগে উঠবে, কি মারা যাবে—বলা অসম্ভব। আশা করি, যার উভয় জাতীয় সংগীতের সঙ্গে সম্যক পরিচয় আছে, এমন কোনও সংগীতজ্ঞ ব্যক্তি এ সমস্তার মীমাংসা করে দেবেন। তবে এ কথা নিশ্চয় যে, যে-উপায়ে আমাদের নব-সাহিত্য গড়া হচ্ছে, সে-উপায়ে নব-সংগীত গড়বার জো নেই; কেননা সংগীত জিনিসটে তর্জমা করা চলে না, ওর ব্যাকরণ থাকলেও অভিধান নেই।

আমি পূর্বেই বলেছি, মার্গসংগীত কিয়চ্ছে। কিন্তু তাই বলে ওস্তাদীর আফিং ছাড়াবার উদ্দেশ্যে কেউ যে তাকে বিলাতী সংগীতের মদ খরাতে প্রস্তুত, এর প্রমাণ তো অসম্ভাব্যি পাই নি। বিলাতী সংগীত যে উত্তেজক পদার্থ, সে-সংগীত যিনি কান দিয়ে পান করেছেন, তিনিই তা জানেন। সংগীত-বিষয়ে আমি গুণীও নই জানীও নই, সুতরাং এই দীর্ঘ প্রবন্ধ লেখবার একমাত্র উদ্দেশ্য হচ্ছে, সংগীতের মামলার ইস্যু ধারণ করে যেওয়া। বিচার আর-পাঁচজনে করুন।

শ্রীপ্রমথ চৌধুরী

সুরের কথা

দেশী-বিলাতী সংগীত নিয়ে যে বাদ্যযন্ত্রবাদের সৃষ্টি হয়েছে, সেখানে যোগে
আমি গলাযোগ করতে চাই।

এ বিষয়ে বক্তৃতা করতে পারেন এক তিনি, যিনি সংগীতবিদ্যার পারদর্শী,
আর এক তিনি, যিনি সংগীতশাস্ত্রের সারদর্শী; অর্থাৎ যিনি সংগীতসম্বন্ধে
হয় সর্বজ্ঞ, নয় সর্বাঙ্গ। আমি শ্বেবোক্ত শ্রেণীর লোক, অতএব এ বিষয়ে
আমার কথা বলবার অধিকার আছে।

আপনাদের সুরের আলোচনা থেকে আমি যা সারসংগ্রহ করেছি, সংক্ষেপে
তাই বিবৃত করতে চাই। বলা বাহুল্য, সংগীতের সুর ও সার পরস্পর
পরস্পরের বিরোধী। এর প্রথমটি হচ্ছে কানের বিষয়, আর দ্বিতীয়টি জ্ঞানের।
আমরা কথার বলি সুরসার,—কিন্তু সে কখনোই হিন্দুসার।

সব বিষয়েরই শেষ কথা তার প্রথম কথার উপরেই নির্ভর করে। যে বক্তার
আমরা আদি জানি নে, তার অস্ত পাওয়া ভার। অতএব কোনও সমস্তার
চূড়ান্ত মীমাংসা করতে হলে, তার আলোচনা ক'থ থেকে শুরু করাই সনাতন
পদ্ধতি, এবং এ ক্ষেত্রে আমি সেই সনাতন পদ্ধতিই অনুসরণ করব।

অবশ্য এ কথা অস্বীকার করা যায় না যে, এমন লোক চের আছে, যারা
দ্রাবিড় বাঙলা বলতে পারে অথচ ক'থ জানে না—আমাদের দেশের বেশির
ভাগ স্ত্রী-পুরুষই তো এ দলের। অপরগকে এমন প্রাণীরও অভাব নেই, যারা
ক'থ জানে অথচ বাংলা ভাল বলতে পারে না—যথা আমাদের ভদ্র শিল্পের
দল। অতএব এক্ষণে হওয়াও আশ্চর্য নয় যে, এমন গুণী চের আছে, যারা
দ্রাবিড় গাইতে বাজাতে পারে, অথচ সংগীতশাস্ত্রের ক'থ জানে না; অপর-
গকে এমন জ্ঞানীও চের থাকতে পারে, যারা সংগীতের শুধু ক'থ নয়,
অক্ষর-বিসর্গ পর্যন্ত জানে—কিন্তু গানবাজনা জানে না।

তবে যারা গানবাজনা জানে, তারা গায় ও বাজায়; যারা জানে না, তারা ও-বস্তু নিয়ে তর্ক করে। কলধ্বনি না করতে পারি, কলরব করবার অধিকার আমাদের সকলেরই আছে। সুতরাং এই তর্কে যোগ দেওয়াটা আমার পক্ষে অনধিকারচর্চা হবে না। অতএব আমাকে ক'থ থেকেই শুরু করতে হবে, অ'আ থেকে নয়। কেননা আমি যা লিখতে বসেছি, সে হচ্ছে সংগীতের বাস্তবলিপি—স্বরলিপি নয়। কারণ, আমার উদ্দেশ্য সংগীতের তত্ত্ব ব্যক্ত করা, তার স্বর সাব্যস্ত করা নয়। আমি সংগীতের সারদর্শী—স্বরস্পর্শী নই।

২

হিন্দুসংগীতের ক'থ অনিন্দ্যে কি?—বলছি।

আমাদের সকল শাস্ত্রের মূল বা, আমাদের সংগীতেরও মূল তাই—অর্থাৎ শ্রুতি।

কিন্তু পাই এই শ্রুতি নিয়ে সংগীতচার্যের দল বহুকাল ধরে বহু বিচার করে আসছেন, কিন্তু আজতক এমন কোনও মীমাংসা করতে পারেন নি, যাকে 'উত্তর' বলা যেতে পারে—অর্থাৎ যার আর উত্তর নেই।

কিন্তু বেহেতু আমি পণ্ডিত নই, সে-কারণ আমি ও-বিষয়ের একটি সহজ মীমাংসা করেছি, যা সহজ মানুষের কাছে সহজে গ্রাহ্য হতে পারে।

আমার মতে শ্রুতির অর্থ হচ্ছে সেই স্বর, যা কানে শোনা যায় না। যেমন দর্শনের অর্থ হচ্ছে সেই সত্য, যা চোখে দেখা যায় না। যেমন দর্শন দেখবার জন্য দিব্যচক্ষু চাই, তেমনি শ্রুতি শোনবার জন্য দিব্যকর্ণ চাই। বলা বাহুল্য তোমার আমার মত সহজ মানুষদের দিব্যচক্ষুও নেই, দিব্যকর্ণও নেই; তবে আমাদের মধ্যে কারও কারও দিব্য চোখও আছে, দিব্য কানও আছে। ওতেই ত হয়েছে মুশকিল। চোখ ও কান সবুছে দিব্য এবং দিব্য—এ দুটি বিশেষণ, কানে অনেকটা এক শোনালেও, মানেতে ঠিক উল্টো।

সংগীতে যে সাতটি সাদা আর পাঁচটি কালো সুর আছে, এ-সত্য পিরানো কিংবা হারমোনিয়মের প্রতি দৃষ্টিপাত করলে সকলেই দেখতে পাবেন। এই পাঁচটি কালো সুরের মধ্যে যে, চারটি কোমল আর একটি তীব্র—তা আমরা সকলেই জানি এবং কেউ কেউ তাঁদের চিনিও। কিন্তু চেনাশোনা জিনিসে পণ্ডিতের মনস্তষ্টি হয় না। তাঁরা বলেন যে, এদেশে ঐ পাঁচটি ছাড়া আরও কালো এবং এমন কালো সুর আছে, যেমন কালো বিলেতে নেই। শাস্ত্রমতে সে-সব হচ্ছে অতিকোমল ও অতিতীব্র। ঐ নামেই প্রমাণ যে সে-সব অতীন্দ্রিয় সুর, এবং তা শোনবার জন্যে দিব্য কর্ণ চাই—বা তোমার আমার তো নেইই, শাস্ত্রীমহাশয়দেরও আছে কি-না সন্দেহ। আমার বিশ্বাস তাঁদেরও নেই। ক্রতি সেকালে থাকলেও একালে তা স্মৃতিতে পরিণত হয়েছে। স্মৃতিই যে ক্রতিধরদের একমাত্র শক্তি, এ সত্য তো অগম্যবিখ্যাত। সুতরাং একথা নির্ভয়ে বলা যেতে পারে যে, সংগীতমন্ডলে পরের সুখে বাল খাওয়া অর্থাৎ পরের কানে মিষ্টি শোনা যাঁদের অভ্যাস, শুধু তাঁদের কাছেই ক্রতি ক্রতিমধুর। আমি স্থির করেছি যে, আমাদের পক্ষে ঐ বারোই ভাল। অবশ্য সাতপাঁচ ভেবেচিন্তে। ও-দ্বাদশকে ছাড়াতে গেলে, অর্থাৎ ছাড়লে, আমাদের কানকে একাদশী করতে হবে।

আর ধরুন যদি ঐ দ্বাদশ সুরের কঁকে কঁকে সত্য সত্যই ক্রতি থাকে, তাহলে সে সব সুর হচ্ছে অমুখর। সা এবং নি'র অন্তর্ভুক্ত দশটি সুরের গারে যদি কোনও অসাধারণ পণ্ডিত দশটি অমুখর জুড়ে দিতে পারেন, তাহলে সংগীত এমনি সংস্কৃত হয়ে উঠবে যে, আমাদের মত প্রাকৃতজনেরা তার এক বর্ণও বুঝতে পারবে না।

যে একটা বিজ্ঞান আছে, এ জ্ঞান সকলের নেই। সুতরাং সুরের সৃষ্টি-স্থিতি-লয়ের বৈজ্ঞানিক তত্ত্ব গ্রাহ্য না হলেও আলোচ্য।

শব্দজ্ঞানের মতে স্রুতি অপৌকষেয়। অর্থাৎ স্বরগ্রাম কোনও পুরুষ কর্তৃক রচিত হয় নি—প্রকৃতির বাক থেকে উদ্ভিত হয়েছে। একটি টানা তারের গায়ে ঘা মারলে প্রকৃতি অমনি সাত সুরে কেঁদে ওঠেন। এর থেকে বৈজ্ঞানিকেরা ধরে নিয়েছেন যে, প্রকৃতি তাঁর একতারায় যে সর্কাতর সারগম আলাপ করেন, মানুষে শুধু তার নকল করে। কিন্তু সে নকলও মাছিমারা হয় না। মানুষের গলগ্রহ কিংবা যন্ত্রস্থ হয়ে প্রকৃতিদত্ত স্বরগ্রামের কোনও সুর একটু চড়ে, কোনও সুর একটু ঝুলে যায়। তা ত হবারই কথা। প্রকৃতির হৃদয়-তন্ত্রী থেকে এক ঘায়ে যা বেবোয়, তা যে একঘেয়ে হবে—এ ত স্বতঃসিদ্ধ। সুতরাং মানুষে এই সব প্রাকৃত সুরকে সংস্কৃত করে নিতে বাধ্য।

এ মত লোকে সহজে গ্রাহ্য করে; কেননা প্রকৃতি যে একজন মহা ওস্তাদ, এ সত্য লৌকিক জ্ঞানেও সিদ্ধ হয়। প্রকৃতি অক্ষ, এবং অক্ষের সংগীতে ব্যুৎপত্তি যে সহজ, এ সত্য তো লোকবিশ্রুত।

প্রকৃতির ভিতর যে শব্দ আছে,—শুধু শব্দ নয়, গোলমাল আছে—এ কথা সকলেই জানেন; কিন্তু তাঁর গলায় যে সুর আছে, এ কথা সকলে মানেন না। এই নিয়েই ত আর্ট ও বিজ্ঞানে বিরোধ।

আর্টিস্টরা বলেন, প্রকৃতি শুধু অক্ষ নয়, উপরন্তু বধির। যার কান নেই, তার কাছে গানও নেই। সাংখ্যদর্শনের মতে পুরুষ স্রুতি এবং প্রকৃতি নর্তকী; কিন্তু প্রকৃতি যে গায়িকা এবং পুরুষ শ্রোতা—এ কথা কোন দর্শনেই বলে না। আর্টিস্টদের মতে তৌর্ধত্রিকের একটিমাত্র অক্ষ নৃত্যই প্রকৃতির অধিকারভুক্ত, অপর দুটি—গীতবাণ—নয়।

এর উত্তরে বিজ্ঞান বলেন, এ বিশ্বের সকল রূপরসগন্ধস্পর্শ শব্দের উপাদান, এবং নিমিত্তকারণ হচ্ছে এই প্রকৃতির নৃত্য। কথাটা উড়িয়ে দেওয়া চলে না, অতএব পুড়িয়ে দেখা যাক ওর ভিতর কতটুকু খাঁটি মাল আছে।

শাস্ত্রে বলে, শব্দ আকাশের ধর্ম; বিজ্ঞান বলে, শব্দ আকাশের নহ
বাতাসের ধর্ম। আকাশের নৃত্য অর্থাৎ সর্বাঙ্গের স্বচ্ছন্দ কম্পন থেকে যে
আলোকের এবং বাতাসের উক্তরূপ কম্পন থেকে যে ধ্বনির উৎপত্তি হয়েছে,
তা বৈজ্ঞানিকেরা হাতেকলমে প্রমাণ করে দিতে পারেন। কিন্তু আর্ট বলে,
আত্মার কম্পন থেকে সুরের উৎপত্তি, সূতরাং জড় প্রকৃতির গর্ভে তা জন্মলাভ
করে নি। আত্মা কাঁপে আনন্দে—সৃষ্টির চরম আনন্দে, আর আকাশ-বাতাস
কাঁপে বেদনায়—সৃষ্টির প্রসববেদনায়। সূতরাং আর্টিস্টদের মতে, সুর শব্দের
অনুবাদ নয়—প্রতিবাদ।

যেখানে আর্ট ও বিজ্ঞানে মতভেদ হয়, সেখানে আপোশ মীমাংসার
জন্ম দর্শনকে সালিশ মানা ছাড়া আর উপায় দেই। দার্শনিকেরা বলেন,
শব্দ হতে সুরের, কিংবা সুর হতে শব্দের উৎপত্তি—সে বিচার করা
সময়ের অপব্যয় করা। এস্থলে আসল জিজ্ঞাস্য হচ্ছে, রাগ ভেঙে সুরের,
না সুর জুড়ে রাগের সৃষ্টি হয়েছে—এক কথায়, সুর আগে না রাগ
আগে? অবশ্য রাগের বাইরে সারগমের কোনও অস্তিত্ব নেই এবং সারগমের
বাইরে রাগের কোনও অস্তিত্ব নেই। সূতরাং সুর পূর্বরাগী কি অনুরাগী—
এই হচ্ছে আসল সমস্যা। দার্শনিকেরা বলেন যে, এ প্রশ্নের উত্তর তাঁরাই
দিতে পারেন, যারা বলতে পারেন বীজ আগে কি বৃক্ষ আগে—অর্থাৎ কেউ
পারেন না।

আমার নিজের বিশ্বাস এই যে, উক্ত দার্শনিক সিদ্ধান্তের আর কোনও
ধাঙন নেই। তবে বৃক্ষানুর্বেদীরা নিশ্চয়ই বলবেন যে, বৃক্ষ আগে কি বীজ
আগে, সে রহস্যের ভেদ তাঁরা বাতলাতে পারেন। কিন্তু তাতে কিছু আসে
যায় না। কেননা ও-কথা শোনবামাত্র আর এক দলের বৈজ্ঞানিক অর্থাৎ
পরমানুবাদীরা, জবাব দেবেন যে, সংগীত আনুর্বেদের নয়—বানুর্বেদের
অন্তর্ভুক্ত। অর্থাৎ বিজ্ঞানের বিষে বিষকর হয়ে যাবে।

আসল কথা এই যে, আমি কর্তা তুমি ভোক্তা—এ জ্ঞান ধার নেই, তিনি

আর্টিস্ট নয়। সুতরাং সংগীত সম্বন্ধে প্রকৃতিকে সম্বোধন করে 'তুমি কতী আমি ভোক্তা' এ কথা কোনও আর্টিস্ট কখনও বলতে পারবেন না, এবং ও-কথা মুখে আনবার কোনো দরকারও নেই। প্রকৃতির হাতে-গড়া এই বিশ্বসংসার যে আগাগোড়া বেহুরো, তার অকাট্য প্রমাণ—আমরা পৃথিবীতে লোক পৃথিবী ছেড়ে সুরলোকে যাবার অল্প লালসিত।

অতএব দাঁড়াল এই যে, সংগীতের উৎপত্তির আলোচনার তার লয়ের সম্ভাবনাই বেড়ে যায়। তাই সহজ মাতৃবে চায় তার স্থিতি, ভিত্তি নয়।

৪

অতঃপর দেশী-বিলাতী সংগীতের ভেদাভেদ নির্ণয় করবার চেষ্টা করা যাক।

এ দুয়ের মধ্যে আর যা প্রভেদই থাক, তা অবশ্য ক-খ-গত নয়। যে বারো সুর এ দেশের সংগীতের মূলধন, সেই বারো সুর যে সে-দেশের সংগীতেরও মূলধন, এ কথা সর্ববাদীসম্মত। তবে আমরা বলি যে, সে মূলধন আমাদের হাতে হুদে বেড়ে গিয়েছে। আমাদের হাতে কোনও ধন যে হুদে বাড়ে, তার বড় একটা প্রমাণ পাওয়া যায় না। তা ছাড়া আমি পূর্বে দেখিয়েছি যে, সুরের এই অতিহুদের লোভে আমরা সংগীতের মূলধন হারাতে বসেছি। সুতরাং এ নিয়ে আর বেশিকিছু বলা নিশ্চয়োত্তম।

দেশীর সঙ্গে বিলাতী সংগীতের আসল প্রভেদটা ক খ নিয়ে নয় 'কর' 'খল' নিয়ে। BLA=রে, CLA=রের সঙ্গে 'কর' 'খল'র কানের দিক থেকেই হোক আর মানের দিক থেকেই হোক, একটা যে প্রকাণ্ড প্রভেদ আছে—এ হচ্ছে একটি 'প্রকাণ্ড সত্য'। এ প্রভেদ উপাদানের নয়—গড়নের। অতএব রাগ ও মেলটির ভিতর পার্থক্য হচ্ছে ব্যাকরণের, এবং একমাত্র ব্যাকরণেরই।

সুতরাং আমরা যদি বিলাতী ব্যাকরণ অনুসারে সুরসংযোগ করি, তাহলে

তা রাগ না হয়ে মেলডি হবে, এবং তাতে অবশ্য রাগের কোনও কতিবুদ্ধি হবে না। আমরা ইংরেজী ব্যাকরণ অনুসারে ইংরেজী ভাষা লিখলে সে লেখা ইংরেজীই হয় এবং তাতে বাংলা-সাহিত্যের কোনও কতিবুদ্ধি হয় না—যদিচ এ ক্ষেত্রে শুধু ব্যাকরণ নয়, শব্দও বিদেশী। কিন্তু যেমন কতকটা ইংরেজী এবং কতকটা বাংলা ব্যাকরণ মিলিয়ে এবং সেই সঙ্গে বাংলা শব্দের অনুবাদের গৌড়ামিলন দিলে তা বাবু-ইংলিশ্ হয়, এবং উক্ত পদ্ধতি অনুসারে বাংলা লিখলে তা সাধুভাষা হয়, তেমনি ঐ দুই ব্যাকরণ মেলাতে বসলে সংগীতেও আমরা রাগ-মেলডির একটি খিচুড়ি পাব। সাহিত্যের খিচুড়িভোগে যখন আমার রুচি নেই, তখন সংগীতের ও-ভোগ যে আমি ভোগ করতে চাই নে, সে কথা বলাই বাহুল্য।

৫

দেশী বিলাতী সংগীতের মধ্যে আর একটা স্পষ্ট প্রভেদ আছে। বিলাতী সংগীতে হারমনি আছে—আমাদের নেই।

এই হারমনি জিনিসটে স্বরের যুক্তাকর বই আর কিছুই নয়—অর্থাৎ ও-বস্তু হচ্ছে সংগীতের বর্ণপরিচরে দ্বিতীয় ভাগের অধিকারে। আমাদের সংগীত এখনও প্রথম ভাগের দখলেই আছে। আমাদের পক্ষে সংগীতের দ্বিতীয় ভাগের চর্চা করা উচিত কি-না—সে বিষয়ে কেউ মনস্থির করতে পারেন নি। অনেকে ভয় পান যে, দ্বিতীয় ভাগ ধরলে তাঁরা প্রথম ভাগ ভুলে যাবেন। তা ভুলুন আর না-ভুলুন, তাঁরা যে প্রথম ভাগকে আর আমল দেবেন না—সে বিষয়ে আমার মনে কোনও সন্দেহ নেই। আমাদের সাহিত্য থেকেই প্রমাণ পাওয়া যায় যে, একবার যুক্তাকর শিখলে আমরা অযুক্তাকরের ব্যবহার যুক্তি-বুদ্ধি মনে করি নে, এবং অপর কেউ করতে গেলে আমরা বলে উঠি—সাহিত্যের সর্বনাশ হল, ভাষাটা একদম অসাধু এবং অশুদ্ধ হয়ে গেল। তবে সংগীতে এ বিপদ ঘটবার বিশেষ সম্ভাবনা নেই। সেদিন একজন ইংরেজ বলছিলেন,

বে-সংগীতে ছয়টি রাগ এবং প্রতি রাগের ছয়টি করে ত্রী আছে, সেখানে হারমনি কি করে থাকতে পারে? আমি বলি ওত টিকই কথা, বিশেষতঃ স্বামী বরন মূর্তিবান রাগ, আর ত্রীর। প্রত্যেকেই এক-একটি মূর্তিমতী রাগিনী। অবশ্য একগু হবার কারণ আমাদের সংগীতের কৌলীত। আমাদের রাগসকল যদি কুলীন না হত, তাহলেও আমরা হারমনির চর্চা করতে পারতুম না— কেননা ও-বস্তু আমাদের ধাত্রে নেই। আমাদের সমাজের মতো আমাদের সংগীতেও আভিজ্ঞতা আছে, এবং তার কেউ আর কারও সঙ্গে মিশ্রিত হতে পারে না। মিশ্রিত হওয়া দূরে থাক, আমরা পরস্পর পরস্পরকে স্পর্শ করতে ভয় পাই, কেননা আভির বর্মই হচ্ছে আত বাঁচিয়ে যরা। আর মিলে-মিশে এক হয়ে বাবার নামই হচ্ছে হারমনি।

বীরবল

| ১৩২০ |

১. সাহিত্যের বনজ : রবীন্দ্রনাথ ঠাকুর
২. কুটিরশিল্প : শ্রীমানসেন বসু
৩. ভারতের সংস্কৃতি : শ্রীকান্তমোহন সেন শাস্ত্রী
৪. বাংলার অর্থ : শ্রীমদীননাথ ঠাকুর
৫. রমনার আবিষ্কার : শ্রীমদীননাথ ঠাকুর
৬. বাংলার ঐতিহাসিক : শ্রীমদীননাথ ঠাকুর
৭. ভারতের ঐতিহাসিক : শ্রীমদীননাথ ঠাকুর
৮. বাংলার ঐতিহাসিক : শ্রীমদীননাথ ঠাকুর
৯. হিন্দু রম্যনী বিজ্ঞান : শ্রীমদীননাথ ঠাকুর
১০. নবজ-পরিচয় : অধ্যাপক শ্রীমদীননাথ ঠাকুর
১১. শারীরিকত্ব : ডক্টর রমেশচন্দ্রকুমার পাল
১২. প্রাচীন বাংলা ও বাঙালী : ডক্টর মুকুন্দনাথ সেন
১৩. বিজ্ঞান ও বিবর্তন : অধ্যাপক শ্রীমদীননাথ ঠাকুর
১৪. আয়ুর্বেদ-পরিচয় : মহামহোপাধ্যায় গণনাথ সেন
১৫. কলীর নাট্যশালা : শ্রীমদীননাথ ঠাকুর
১৬. রজন-ক্রমা : ডক্টর মুকুন্দনাথ ঠাকুর
১৭. জমি ও চাষ : ডক্টর সত্যেন্দ্রনাথ ঠাকুর
১৮. বুদ্ধোত্তর বাংলার কৃষি-শিল্প : ডক্টর মুকুন্দনাথ ঠাকুর

| ১৩২১ |

১৯. ভারতের কথা : শ্রীমদীননাথ ঠাকুর
২০. জমির মালিক : শ্রীমদীননাথ ঠাকুর
২১. বাংলার চাষী : শ্রীমদীননাথ ঠাকুর
২২. বাংলার রায়ত ও জমিদার : ডক্টর শচীন সেন
২৩. আমাদের শিক্ষাব্যবস্থা : অধ্যাপক শ্রীমদীননাথ ঠাকুর
২৪. দর্শনের রূপ ও অভিব্যক্তি : শ্রীমদীননাথ ঠাকুর
২৫. বেদান্ত-দর্শন : ডক্টর রমা চৌধুরী
২৬. যোগ-পরিচয় : ডক্টর মহেন্দ্রনাথ সরকার
২৭. রসায়নের ব্যবহার : ডক্টর সত্যেন্দ্রনাথ ঠাকুর
২৮. রমনার আবিষ্কার : ডক্টর জগন্নাথ ঠাকুর
২৯. ভারতের বনজ : শ্রীমদীননাথ ঠাকুর
৩০. ভারতবর্ষের অর্থনৈতিক ইতিহাস : রমেশচন্দ্র দত্ত
৩১. ধনবিজ্ঞান : অধ্যাপক শ্রীমদীননাথ ঠাকুর
৩২. শিল্পকথা : শ্রীমদীননাথ ঠাকুর
৩৩. বাংলা সামরিক সাহিত্য : শ্রীমদীননাথ ঠাকুর
৩৪. মেগাথেনীসের ভারত-বিবরণ : শ্রীমদীননাথ ঠাকুর
৩৫. বেতার : ডক্টর সত্যেন্দ্রনাথ ঠাকুর
৩৬. আন্তর্জাতিক বাণিজ্য : শ্রীমদীননাথ ঠাকুর

বিশ্ববিদ্যাসংগ্রহ

বিজ্ঞান বহুবিস্তীর্ণ ধারার সহিত শিক্ষিত-মনের যোগসাধন করিয়া দিবার জন্য ইংরেজিতে বহু গ্রন্থমালা রচিত হইয়াছে ও হইতেছে। কিন্তু বাংলা ভাষায় এ-রকম বই বেশি নাই যাহার সাহায্যে অনায়াসে কেহ জ্ঞানবিজ্ঞানের বিভিন্ন বিভাগের সহিত পরিচিত হইতে পারেন। শিক্ষাপদ্ধতির ক্রটি, মানসিক সচেতনতার অভাব, বা অন্য যে-কোনো কারণেই হউক, আমরা অনেকেই স্বকায় সংকীর্ণ শিক্ষার বাহিরের অধিকাংশ বিষয়ের সহিত সম্পূর্ণ অপরিচিত। বিশেষ, যাহারা কেবল বাংলা ভাষাই জানেন তাঁহাদের চিন্তাহীনতার পথে বাধার অন্ত নাই; ইংরেজি ভাষায় অনধিকারী বলিয়া যুগশিক্ষার সহিত পরিচয়ের পথ তাঁহাদের নিকট রুদ্ধ। আর যাহারা ইংরেজি জানেন, স্বভাবতই তাঁহারা ইংরেজি ভাষার দ্বারস্থ হন বলিয়া বাংলা সাহিত্যেও সর্বাঙ্গীণ পূর্ণতা লাভ করিতে পারিতেছে না।

যুগশিক্ষার সহিত সাধারণ-মনের যোগসাধন বর্তমান যুগের একটি প্রধান কর্তব্য। বাংলা সাহিত্যকেও এই কর্তব্যপালনে পরাজুথ হইলে চলিবে না। তাই এই দুর্যোগের মধ্যেও বিশ্ব-ভারতী এই দায়িত্বগ্রহণে ব্রতী হইয়াছেন।

। ১৩২ ।

৩৭. হিন্দু সংগীত : শ্রীপ্রমথ চৌধুরী ও শ্রীইন্দিরা দেবী চৌধুরানী

। শীঘ্রই প্রকাশিত হইবে ।

৩৮. প্রাচীন ভারতের সংগীত-চিন্তা : শ্রীঅমিয়নাথ সান্যাল

৩৯. কীর্তন : শ্রীখগেন্দ্রনাথ মিত্র

৪০. বিশ্বের ইতিকথা : শ্রীস্বশোভন দত্ত

৪১. ভারতীয় সাধনার ঐক্য : ডক্টর শশিভূষণ দাশ গুপ্ত

৪২. বাংলার সাধনা : শ্রীক্ষিতিমোহন সেন

৪৩. বাঙালী হিন্দুর বর্ণভেদ : ডক্টর নীহাররঞ্জন রায়